

ZOU PRESBYTERIAN CHURCH SYNOD

The Presbyterian Church of India

NAUPANG SUNDAY SCHOOL ZILLAI



Junior Khatna

Revised Edition 2017

Published by:

Publication Board

Zou Presbyterian Church Synod

NAUPANG SUNDAY SCHOOL ZILLAI

JUNIOR KHATNA

Zou Presbyterian Church Synod

First Edition Copies: 500

Second Edition: January 2011 Copies: 200

Third Revised Edition: March 2017 Copies: 500

Published by:

Zou Presbyterian Church Synod

Zomi Colony

Churachandpur

Manipur

Post Box-48

Pin-795128

Typeset at: Pemciels

Churachandpur

Printed at: Lamka Printing Studio

Churachandpur

Manipur



Office of the

ZOU PRESBYTERIAN CHURCH SYNOD

(The Presbyterian Church of India)

Zomi Colony, Churachandpur, Manipur. Post Box-48, PIN-795128. email=zpcs@rediffmail.com

THUMASA


Zou Presbyterian Church Synod nuoi a Naupang Nipi Sang subject Junior bu khatna a bei toh kituoh in sut kia thei ahizieh in Mangpa Pasian min i phat uhi.

Tam Junior bu khatna ahileh Literature and Publication 1st Committee Resln. No. 2 dated 28th February 2017 leh Sunday School 1st Committee Resln. No. 2 dated 2nd March 2017 na bang in Revised leh etdihna Committee ngansie bang in Rev. Kaimuanlal, Leader, ZPYF leh Rev. Khamchinkhai, Executive Secretary, i/c Youth panlahna toh sut kia thei ahia, amau tung ah committee sihle-tang in kipah thu i gen uhi.

Mangpan tam Junior bu khatna subject khu zillai sangnaupangten hagau mitvahna aneina leh Laibu manpha hiding in vanzat loupitah hisah taken.

Simtute zousie Mangpan guolzawl taken.

Synod Office
13th March 2017


(REV. KHAMCHINKHAI)
Executive Secretary
i/c Sunday School
Zou Synod

INDEX

1. Achiil in Pasion in.....	01
2. Kaina leh Abel.....	03
3. Noah hun laai a tui let thu.....	05
4. Babel innsawng saang.....	07
5. Pasion in Abraham ahan hi.....	09
6. Isak ji diing suina.....	11
7. Jacob in aji ding a thalaw hi.....	13
8. Joseph a kipuonkhietna.....	15
9. Mosi hat thu	18
10. Lamkai mihangsan Joshua	21
11. Hannah in atapa Pasion pie	23
12. Ruth Boaz te lou ah kuon.....	25
13. Meithai thawlawm	27
14. Jerusalem ah leeng bang in	29
15. Jesun a nuajuite ann a nehpi.....	31
16. Jesu khailia uh.....	33

17. Jesu a thoukiata	36
18. Jesu a kihil zel hi	39
19. Jesu a dia mi gin-um	41
20. Sawltah Paul.....	44
21. Phillip.....	46
22. Kornelia.....	48
23. Barnabas.....	51
24. Johan Mak.....	53
25. Prislā leh Akuila-te nupa.....	55
26. John Calvin	59

Zil diing - 1

ACHIL IN PASIAN IN LEI LEH VAN ASIEM HI

Sim diing : *Siem. 1:1-25; 2:1-3; John 1:3*

Atup leh Angim : *Pasian in sil zousie asiem hi.*

1. Sil zousie siem a, akemtu khu Pasian ahi:

Siemchilbu bung khatna leh Johan bung khatna ah silsiem thu imu uhi. Siemchilbu ah Pasian in ni gup sung a, asilsiem dan imu uhi. Vah asiem a, mun awng zong asiem hi. Tuisuogiette leh Leitung leh a sung a um hinna nei zousie, tunglam a Ni leh Ha leh Aasite leh Mihingte zong a un in Pasian siem ahi. Silsiem zousie khu Pasian siemlou bangma a umsih hi.

Tam asil siemte khu Pasian in a thelthang mai louna dingin hoitah in akem a, hunbi nei chiet ding in hoitah khat in ahunbi ding uh asiempieh hi. A sil siemte lah ah mihingte khu angai poimaw tuom se a, dih loutah a, agamtat chieng un, a gawt zel hi. Akisia theina dingun lampi a ngaituo sah a, atawp atawp in amaute hundampa dingin atapa Jesu apeta hi. Pasian in mihing asiem zou a, abuoipi dan khu Bible ah akichien mama hi.

2. Asiempa'n asilsiemte khu, zeneitah in asiem hi:

Lei leh Van gamsate leh mihingte, Pasian in asiem zieh khu Ama min thupina ding leh Ama pahtawi ding a asiem ahi (Late 86:9). Van in Pasian thupi dan akilangsah a (Late 19:1). Ni leh Ha leh Aasite khu asuvahtu dingin asiem a, (Late 74:16).

A dieh in Mihingte'n Pasion i pahtawi ding khu ileibat uh ahi.
Pasion in ahing phut ahi(Danbu 4:30-33,37).

3. Pasion in asilsiemte khu hoi asa mama hi :

Pasion in asil siemte khu, bang chiin ngaituo va na chi uoi?
Leitung leh Tuisuogiet, Ni leh Ha leh Aasite, Tui a teng hinna
nei zousiete, Huikhuo a leng theite, Leitung a um, Sil zousiete,
khu Pasion in a en a, hoi asa mama hi.

(Siem. 1:10,12,18,21,25,31).

Pasion silsiem zousiete'n hoi dan chi khat anei chiet uhi.
Pasion thu awi giltahtah mite'n Pasion gildan akitanpi ua,
silsiem zousie khu hoi asa uhi. Mihingte zong pulam lat dan
a te lou in, Tunglam a i thupi dan, mi zousie kibang ihi dan
a ngaituo uhi. Nam khangtouloute'n Pasion silsiemte khu
ahoidan athei sih ua, suhsiet mai ding asawm uhi.

Thuchiin:

*Sil zousie Ama tungtawn a siem ahia, silsiem chinteng Ama
lou a kisiem bangma a um sih hi. Johan 1:3.*

Dohna :

1. Silsiem zousie koi siem ahiei?
2. Pasion in mihingte bang ahing phut ei?
3. Pasion in asilsiemte bangchin a ngaituo ei?
4. Nam khangtouloute'n Pasion silsiemte khu, bang alaw sawm uoi?

.....

Zil diing - 2

KAIN LEH ABEL

Simding : *Siem. 4:24*

Atup leh Angim : *I tu ga chiet i at ding uhi.*

1. **Khelna khu dan susetu leh shina tuntu ahi:**

Kain khu lou nasem mi ahia, Abel khu Belam chingmi ahi. Kain in alou gasuo Pasian ah silpieh in apie a, Abel in zong a gantate lah a, pieng masapen leh athau penpen Pasian ah apie hi. Abel in pieh dan dihtah in apie a (Pawt. 22:29,30), Abel tung ah Pasian a kipah hi. Hinanleh Kain silpieh tungah Pasian akipah sih hi. Pasian akipah theilou azieh a um ngei ngei ding hi. Pasian deilou dan a apieh e? Pieh ding dantah a apieh lou e? Pieh ding dan tah a apieh lou zieh ahi ngei ngei ding hi. Tuazieh in Kain khu Abel tung ah alungthahta a, ni khat a naupa Abel khu lou kuon ding in achiel a, loulai ah a thatta hi. Tam khu tuolthana masapen ahi. Asil bawl khielna in mi dihtat tung ah shina atunta hi.

Pasian in Kain kung ah Abel hei a um e, chi in a dong a, Kain in “Ka thei kha sih, Ka naupa ching lah hilou ing a” chi in zuou agenta hi.

2. **Pasian khu Lungsim entu ahi:**

Kain in Pasian kipahna ding khop in silpieh apesih a, alungsim gilou nalai, Pasian thu awi sawmlou khu Zawlnai Isai in, Silpieh tawi nawnsih un achi hi (Isai 1:13-15). Anania leh Saphira te nupa in zong agam man uh akimkhat aselguh zieh un ashi law uhi (Nasep 5:1-11).

Silpieh dan khu apoimaw mama a, Silzousie hing pepa Pasian kung a, ahoi penpente pieh ding ahia, tuaban ah kiphaltah a ipieh ding uh ahi. Pasian gam a dia ipieh chieng un, ahoi hoi ipieh ding uh ahi. Sum asie sie ipieh chieng in, ipieh laitah a ilungsim pen ahoilou ahi nuom hi. Kain silpieh Pasian akipah louna zieh zong, apieh dan leh alungsim asienthou lou zieh ahi.

3. I tu ga ma i at chiet ding hi:

Abel khu Bible in mifel, mihoi ashi nua a thugen (Heb. 11:4) ana chi hi. Mangpa'n Kain kung ah "Na naupa sisan aw in, leitung a pat ahing kikou a, Tuaziehin sapsiet a um na hita a, tualeh haichi chiin sawm nanlechin bangma a gasuo ngap nawn sih ding a, Lei ah inn leh lou nei lou in na vahvai den ta ding hi" achi hi. Kain khu anuoikiet a, gentheitah in ahinkhuo amangta hi. Abel khu athupi mama a, nop tah in vangam ah akhawl dam hi.

Thuchiin:

Hoitahin na tai uhi, thutah zuina a kipat noute hing dal koi ahiei? Tam banga kizawllungdamna pen noute hing hanpa a kipat ahi sih hi. Galati 5:7,8.

Dohna:

1. Kain bang nasem mi ahiei?
2. Abel bang na sem mi ahiei?
3. Kain in bangchin Pasian ah silpieh apie ei?
4. Abel in bangchiin Pasian ah silpieh apie e?
5. Kain in anaupa atha zieh in, Pasian in Kain kung ah bang agen ei?
6. Pasian a, sil ipieh chieng a, bangchi bangte pieh ding ahiei?

.....

Zil diinjg - 3

NOAH HUN LAI A TUILET THU

Simding : *Siem. 6:9; 8:19*

Atup leh Angim : *Thu man khu damna ahi.*

1. Noah mihoipa leh ama hunlai a mite gitlou dan:

Mihing masa pen Adam leh Evi hah leh suonte ahing pung zel ua, kum tamtah nua in mihing ahing tamta mama a, hinanlezong agilou thei mama uhi. Pasian zatatna him him a neisih ua, huasanna leh thanguoia in adim uhi. Agitlou seng zieh un Pasian zong amihing siem tung ah akisiata mama hi.

Hinanlezong khum hun lai in mikhat mihoi mama, gilou ngai lou a um a, tua khu Noah ahi. Noah tung ah Pasian akipah mama hi. Tua hun lai a mite lah a gensietna bei umsun khu ama ahi. Noah khu Pasian toh akipawl zel hi (Siem.6:8). Tuaban ah mi zousie gilou a, ama hoi chi tah a ahoi zieng pen akidang mama hi.

2. Noah in Pasian thu bangin Kuong a sui:

Mihingte a gitlou seng zieh un, Pasian in mihingte leh Ganhing zousie sumangthai asawmta a, Noah khu kuong sui ding in asawlta a, Noah in Pasian thu bangin tahsing in kuong asui panta hi. A dung tong 300, Avai tong 50 tualeh asanlam tong 30 ahi. Kuong sung ah pindan asiem a, Tui alut theilouna dingin, Chim singnai in ahubit hi. Sawttah asui nua in azouta hi.

3. Tuisang ahing letta:

Noah in kuong asui zou in, Pasian in Noahte Innkuon kuong sung a lut dingin ahil a, Gamsate, Vasate, Hinna nei zousie achi lahna ding in kop ni chiet kuong sung ah akoi sah a, buoihuoi va na chi uai?

Kuong sung a alut zou diem un, Pasian in Guo ahing zu sahta a, Ni 40 leh Zan 40 azuta hi. Tui in mun zousie atumta a, Leitung a Vasate, Gamsate, Ganhing zousie leh Mihing zousie a un in ashita uhi. Noahte Innkuon noptah in kuong sung ah a um ua, Ni tamtah zou in tui khu akiemta a, Noah kuong khu Ararat muol ah a kingata hi. Ararat muol khu tulai a Turkey Mal simlam ah a um a, ft. 17,000 vel a sang ahi. Tui akan phet in Noahte Innkuon mi 8 khu kuong sung apat in ahing pawtdohta uhi (IIPet. 2:5). Tuachiin Noah in Maitam asiem a, kithoina silpieh alaan hi.

Tuisanglet zieh a, shina hing tung khu mihingte gitlou zieh ahi. Hinanlehzhong mihoi Noah in Pasian thu a man zieh in ama leh a Innkuonte leh lei a hinna neite khu hutdam in a um uhi.

Thuchiin:

Mangpa 'n Ama ngaisah mite khu solna akipat hutkhiet dan leh midihtat loute khu vaihawmni a dinga gawt kawm a khawidan a thei hi. II Peter 2:9.

Dohna :

1. Noah hunlai a mite gitlouna bang lam ahiei?
2. Noah kuong Adung, Avai, Asanlam tong bangzat ahiei?
3. Tuisanglet in Pasian thumangloute bangchiin aum ei?
4. Noah kuong hei mun ah akinga ei?
5. Ararat muol khu hei gam a um ahiei? Tualeh bangtan vel a sang ahiei?
6. Noahte Innkuon mi bangzat hutdam in a um ei?

.....

BABEL INNSAWNG SAANG

Simding : *Siem. 11:32*

Atup leh Angim : *Minthang utna in buoina ahing tun leng hi.*

1. Noah ta leh suonte apei khiei kiata:

Tuisang alet in a huoise mama a, Noah leh a innkuonten ahoipi ding uh hileh kilawmtah ahia, hinanleh ahoipi sawt vawt sih ua, khawsahna lam ah ahing khanglien zel zaw uhi. Sinar gam (Babulon, tulai a Irag gam) ah phaizang amu ua, tuanah atengta uhi. Tua mun khu Euphrates leh Tigris luiguom phaizang gam hoitah ahi. Nasatah in ahing khanglienta ua, Inn lamna ding in tehlei a zang ua, atukipna ding in singnai azang uhi.

Aminthanna ding un, Babel Innsawng sang Van hawlpha a lam sawmta ua, kikhenzahlou a mun khat a ten khawm ding ahing lemguotta uhi. Babel Innsawngsang khu ahing lam panta ua, hinanleh Pasian in a suhpichin ding uh aphal sih hi (Siem. 33:4).

2. Amau dia silhoilou ahizieh in, Pasian alungthahsah uhi:

Minthan ding a ut sengseng zieh un, Pasian in leitung luo dim ding a thu apieh khu (Siem. 9:1) akihei mangsan ua, tua Babel Innsawng a tenkhawm ding khu angaituota uhi. Abul a apute uh khelna, amau uah ahing um khie a, kiliensah in biech ding dan ahing suita uhi. Pasian in asilbawlte uh a enchien a, angaituona uh lampi adei sih hi. (Siem. 11:5,7).

- 3. Pasian in mikiliensahte ahuo hi :** Babel Innsawngsang alam sawm uh khu Pasian in apha sih a, aham uh a sophal piehta hi. Tuachiin a thugen uh akithei tuo khat zong aum nawnsih ua, atawp in mun chin ah akikhenzahta uhi.

Nam khantouna khu Pasian in ahaw sih a, hinanlehzong nam hing tawisangtu, Pasian deibang a hinkhuo izah lou a, Pasian iki heimangsan leh ei a ding in sietna ahi ding hi.

Pasian gam suhsiet khu kiletsahna leh ki-uahsahna ahi zel hi.

Thuchiin:

“Kisahtheina khu sietna masangah apei a, tualeh lungsim ki uongsah khu puasietna masangah apei hi.” Thupil 16:18.

Dohna:

1. Minthanna ding a a innsawng lam uh khu bang innsawng aki chi ei?
2. Babel Innsawngsang bangzieha alam zou lou uh e?
3. Nam khangtou khu Pasian in ahuo amah?
4. Bang chi bangte e, Pasian in ahuot?
5. Babulon khu tulai in bang gam akichi ei?

.....

PASIAN IN ABRAHAM AHAN HI

Simding : *Siem. 12*

Atup leh Angim : *Thuman khu guolzawlna ahi.*

1. Abraham Pasian in ahan hi:

Abraham' pa khu Tera ahia, Abraham' ji khu Sari ahi. Haran khuo a aten lai in apa Tera ahing shita hi. Tua mun a aum lai in Pasian in Abraham ahing hanta a (Siem. 12:1-3). “Na tenna gam nuasie in ka hing kawhmu ding gam zuon in peitan, tuachiin nam thupitah in ka hing siem ding a, na min zong ka thangsah ding hi; tualeh nangma hing guolzawl pouma guolzawl vang in, nang hing samsie tapou khu keiman sapsietna pevang, tuachiin nang a kipat in nam chinteng guolzawlna pevang” achita hi. Tua zou chieng in sil umdan ding Pasian in ahilsih a, Abraham ding in Pasian thugen gingtat dan ding ahamsa mama ding ahi.

Pasian hatna azah tah in, Abraham in Lot apui a, apawtkheta uhi. Kanaan gam lam zuon in apei ua, tuachiin ava tungta uhi. Pasian Abraham kung ah akihil a, **“tam gam khu na suon na hahte ka pe ding hi”** (Siem. 12:7) achi a, Abraham khu van a Aasite a ensah a, na suon nahahte tua bang a tam ding ahi achi a, hinanleh ta la anei nai sih ua, Abraham khu kum 100 vel ding ahita a, aji Sari khu kum 90 vel ahita hi (Siem. 17:15-19). Ahah asuon van a Aasi za Pasian in achiem khu agingta khawl sih a, ahun tah in tapa khat Isak kichi ahing neita hi. Tuin Abraham le Sari akipah mama uhi. Isak khu naupang thumang leh mifeltah ahing hita hi.

Isak khu ahing khanglienta a, Pasian in Moria tang ah halvam kithoina silpieh a na tapa na hing lat ding achita a, Abraham in aji zong hil ngam sih va na chi uoi? Eite hilei **“Mangpa**

talawm ngal teh” ichi ding uhi. Abraham in Pasian agingta a, tuachiin atapa halvam kithoina silpieh ding in, Isak khu akan tawmta a, Maitam tung ah akoita hi. Abraham in atapa tha ding ahing sawmta hi. Tuanah Pasian in aginna amu a, akipah mama a, halvam kithoina ding in Belamnou khat apeta hi. Tuazieh in Bible in “Ginna Pa” chi in agen hiel hi. Shi tanpha a ginum a Pasian imuon ngam ding uh ahi.

3. Suongtu bul ahing hita hi:

Tuabanga mi gin-um Abraham khu Hebraite suongtu bul ahing hita hi. Judate Abraham suon ahi zieh un, Juda hi khu aki letsahpi mama ua, hundamna huong a um bangin akingai hiel uhi. Tahsa lam ah suon leh hah thu ah bangma phattuomna a um sih a, Jesu suongtu bulpi ahia, ei gingtute a dingin Ginna pa ahi hi. Tuachiin Abraham suon apat in Khovel hundam ding in Jesu hing pieng hi.

Thuchiin:

“Ginnain Abraham khu anua chienga ahing luo ding gam a pei dinga hat a a um lai in athumanga, tualeh apeina ding mun theilou hinapi, apeidohta hi.” Heb. 11:8.

Dohna:

1. Abraham tenna khuo min bang e?
2. Abraham pa min leh aji min bang e?
3. Abraham Pasian in guolzawlna bang bang achiem ei?
4. Abraham tapa min bang e?
5. Abraham Pasian in ahat in aniel amah?

.....

ISAK JI DIING SUINA

Simding : *Siem. 24:*

Atup leh Angim : *Koppi sui dan a pilvang ding ahi.*

1. **Isak ji ding asui uhi** : Isak minkhietna khu ‘*Nui*’ china ahi. Israel suongtute lah a ji khatnei umsun ahi. Abraham in atapa ji ding khu adei tel mama a, asuohpa, asui ding a asawlpa kung ah tambang in agen hi :
- a) A tenna Kanaan mi nungah te lah ah asui sih ding a.
- b) Agam lam a ama chipi te lah a ava sui ding ahi.

Tamteng alawchin na dingin Abraham in asuohpa akiahhsiel sah a, asuohpa’n zong tua bang a bawl ngei ding sawm in Mesopotamia gam azuonta hi. Tuitawdoh bul ah thumna anei a, tuachiin apu Isak ji ding khu tui tawi in ahing pei a, tui dawn ding a ngen a, amanu’n zong phaltah in asepai hi. Thamlou in a sangawngsaute zong tui a pie hi. Abraham sanggampa Nahor tapa Bethuel tanu, Rebekka ahi. Abraham suohpan dangka bilba Rebekka abasah a, ngun tau akhut langkhat tuoh ah abun sahta hi. Tuabanga alawchin zieh in Abraham suohpan, Pasian kung ah kipahtu agen hi.

Abraham suohpa khu Rebekka te inn ah azintung a, aneh ding asiemsah ua, hinanleh ane nuom pai sih hi. A peina zieh alawchin leh alawchinlou athei masang in ane nuom sih a,

athei chien chieng a ann neh pan ding a sawm hi. Tuachiin Bethuel in aphal piehta a, Bethuel in Rebekka kung ah “tampa toh na zawhkhawmta ding uh e” achi a, Rebekka in “ing heh” achia, Rebekka in apa thu a man dan etton tah ahi. Tuachiin asuohpan Rebekka apuita a, Isak in ana lamdawn a, kipahtah in akitengta uhi.

2. Koppi bangchi sui ding? Lampi li in igen ding uhi:

- a) Pasion kung ah i koppi ding inget ding uh ahi. Pasion in Adam kung ah ***“Na koppi ding a kilawm ka hing siem sah ding hi”*** achia, tua ma bang in Pasion hing siem sah khu, Pasion kung a nget ding ahi.
- b) Ginna a ikibatpite sui ding ahi. Hattuum thununna dan in ***“Ginglou mite ji leh Pasal a nei ding ahi sih hi”***. Khristian leh Khristian loute ikiten ding uh ahi sih hi.
- c) Nu leh Pate’n sum ngainatna a tate koppi ding sui ding ahi sih hi. Hagau lam hinkhuo ding gel a sui ding ahizaw hi.
- d) Khristian Innkuon siemtup thei ding mi sui ding ahi.

Thuchiin:

Na lungtang zousie in Mangpa muong inlen, nangma theina ah kinga sin. Thupil 3:5.

Dohna:

1. Isak min khietna bang e?
2. Abraham suohpan Rebekka bangbang apie ei?
3. Rebekka pa min bang e?
4. Abraham in asuohpa, atapa ji ding sui in asawl a, avaiha thu nite bang leh bang e?
5. Isak ji min bang e?

.....

JAKOB IN A JI DING A THALAW

Simding : Siem 29:15-30.

Atup leh Angim : Mi zuou a na hem leh nangzong zuou in min ahing hem ding hi.

1. **Jacob:** Jacob min khietna **“Mi tan ding lahsah”** china ahi. Esau khu apa Isak akipan guolzawlna adon theina ding a sakhi man a gamlah a apawt kal in, Jakob khu anu’n Kelsa ana ngaituohsah in apa Isak ana nesahta, tuachiin Jacob in a U pa guolzawlna tan ding teng ana kilahta hi. Tam thu a U pan athei in alungthah ta mama a, anaupa Jakob tha asawm ta hi. Anu’n athei a, Jakob khu asanggampa Laban kung ah asawl mangta hi.
2. **Apu Laban ava muta hi :** Jacob in apu Laban umna/tenna Padan Aram gam zuon in apei ta hi. Lougam phaizang lai a tuitawdoh kisin a um ava mu ta a, agei lah a Belam guol thum ana lum a, Belam chingtupa’n tuitawdoh kot hong in a belamte tui apie hi. Tuapa kung ah Jakob in apu Laban hei a um ahei? chi in adong a, aman ana hil zel hi. Atawp atawp in apu Laban tanu Rachel ahing pei a, Rachel belamte Jakob in tui ana pie hi. Tuachiin Jakob in Rachel kung ah kap kawm in Laban tupa ahi dan agen hi. Tam thute Rachel in apa ahil a, tuachiin Laban toh Jakob aki mu ta uhi. Jakob khu apu Laban kung ah hakhat aum ta hi.

3. **Jakob in aji thalaw in na sem :** Laban in Jakob kung ah *“katupa nahi zieh in, athawn in ka na nasep ding ahi sih, bang na thalaw diei?”* achia, Jakob in, *“Na tanu atum pen Rachel kum 7 na belam ching in ka thalaw ding hi”* achia, tuachiin kum 7 sung belam ching in Rachel a thalaw ta hi. Jacob in Rachel adei seng man in gim leh tawl zong khaw asa sih a, apang vevaw a athei lou kal in kum 7 ahing ching ta hi.

4. **Laban in Jacob asol hi :** Kum 7 achin tah in Jacob in apu Laban kung ah *“Ka ji ding khu hing pe tan”* achia, Laban in lamkaite achial khawm a, annzaluina asiem hi. Zanolai in Rachel unu Leah apeta hi. Zingmawngin Jakob in athei khie a, alungthah ma ma hi. Jakob in a u Esau guolzawl na tan ding khu zuou a apa asol zieh in, a Pu’n zong zuou in ama asol ta hi, sil hoilou ibawl leh silhoilou ma aga suoh a, itunga i at chiet ding uhi.

Jakob in apu Laban kung ah *“Bangzieh a nang sol ahiei”* achia, apu Laban in *“Tate a u ma sang a naupangzaw pen moutha theilou ahi. Ka gam uh pai dan ahi sih hi”* achia, hinanleh kum 7 ma Belam ching in Rachel athalaw kia a, tuachiin apu Laban in kum 7 zou in Rachel a peta hi.

Thuchiin:

“Sol in umsih un, Pasion pen simmaw guol ahi sih hi, aziehpén mi’n atu phot uh tua ma a at ding uhi. Aziehpén tahsa lam a tu miin tahsa lam a sietna a at dinga, hinanleh Hagau lam a tu miin Hagau a kumtawn hinna a at ding hi”. Galati 6:7,8.

Dohna:

1. Jakob min khiet na bang e?
2. Laban hei gam a teng ahiei?
3. A u guolzawl na lahpieh pa khu koi e? Bang achi la pieh e?
4. Jakob in aji Rachel kum bangzat athalaw ei?
5. Jakob in atunga a at bang e?

.....

Zil diinjg - 8

JOSEPH A KIPUONKHIETNA

Simding : Siem. 45

1. **Joseph a U ten zua uh** : Jacob in ta 12 anei a, tua mite lah a Rachel toh ata neite khu, Joseph leh Benjamin ahi. Joseph khu mi thudih ahia, tuazieh in apan adeisah tuom a, puanah pawl hoitah akhui sah a, aute athangse mama uhi. Zankhat mang anei a, tua amang aute kungah agen ta hi, Eite loulai abu phal tom khawm a ium uleh kei buphal ahing ding a, nou buphal zousie ten kei a hing kimkot in ang kun chiet uhi,” achia, a uten tam athei zieh un amu da mama uhi. tualeh mang dangkhat anei kia a, “Ni leh Hapi leh Aasi te ka masang ah hing kun kamu hi”, achi kia hi. Tam thu zieh in aute alungthah sem sem ua, nang lom lom maw ka tung ua, kumpi vaihawm a na pan ding achi uhi (Siem. 37:8).

Joseph Uten belum a chin lai un, nikhat Jacob in Joseph a ute enkhe ding in asawl ta hi. A uten gal apat in Joseph ana mu ua, tha asawm ta uhi. A ute kung atun tah in a uten apuonnah tual asut pieh ua, Joseph khu guomkuah sung ah akhe ta uhi. Ismael mihawn khat khuol zin summet bawl Aigupta lam zuan in ahing pei ua, guomkuah sung apat in ala doh kia ua, dangka som ni(20) in azua ta uhi. A uten apuannah khu a eh mal ua, kel khat that in tua puannah khu kel sisan anu ta uhi. Tuachiin Jakob a en sah ua, “Na tapa humpi in ane ta hi”, achi uhi.

- 2. Joseph in Pasian athei zing hi :** Joseph khu Aigupta gam ah apui ta ua, Aigupta lengpa Pharo nuoi ah lamkai khat Potiphar in Ismael te kung apat in ana leisawn hi. Potiphar in Joseph khu adei sah ta mama a, Inn sung a mopuah na teng akhut ;ah akoi ta hi. Api nun Joseph luppi a sawm zing a, hinanleh Joseph anuom ngai sih hi. Tuachiin nikhat apinun Joseph apuan in a man a, hinanleh Joseph kitung doh in a puan ataisan ta hi. Tuachin apasal kung ah tam pan suh min siet ahing tum hi chin aheh a, tuachin apun suongkul ah akhumta hi (Siem. 39:1-20). Hinanleh Pasian in aumpi a, sungkul ngah pa alungsiet sah a, Joseph khut ah sil zousie ape khe ta hi. Pasian in Joseph silbawl zousie asupi ching sah hi.
- 3. Joseph Pasian in aumpi zing hi :** Aigupta Lengpa Pharo in mang kidang mama ni anei a, amang khu Aigupta gam a mipitlte'n akhietna athei sih ua, tuachiin Pharo khu alungkham ta mama hi. Atawp tawp in Joseph suongkul apat lahdaw a um in, tambang in Pharo mang ahil chien sahta hi. Aigupta gam ah kum hoi kum 7 ahing tung ding a, tuazouchieng in kum hoilou kum 7 kial atung ding hi. Tuabanah kum hoi kum 7 sung a bu lakhawm ding mi gin-um khat guot ding in Pharo ahil ta hi. Tuomi nasem ding in Pharo in Joseph aguot ta a, tuachiin Joseph in Bu piengte tamtah akaikhawm ta hi.
- 4. Mihoi a pat in gahoi a pawt :** Kialpi ahing tung ta a, Kanaan gam a zong Jacob tate khu kial anasat seng zieh in, alungkham ta mama ua, Aigupta gama a pua sui ding in Jacob in a tate a sawl ta hi. Joseph in a sanggamte ana theichien mama a, asanggamte'n ahi leh Joseph athei non sih uhi. Joeph in a lungsim lah a, Gam enkhetu (CID) a hing pei hi ute, na u naute lah a aneupen Benjamin ka kung ah hing pui unlen, tua mateng in Simeon khu tana ka kung ah aum ding achi hi. Tuachiin adang teng apei sah ta hi.

A ann puah uh abei phet in, Jakob in atate pua sui ding in asawl kia a, hamsa sa nanlehzong, kial anasat seng zieh in pei lou thei lou ahizieh un, tuachiin Benjamin zong a pui ua, Aigupta ahing tung ta uhi. Joseph in a sanggamte khu hilou pipi in angaw bawl a, hinanleh kisum/kiip zou non lou in, aki phuonng kheta a, akap khe ta hi. Asanggamten lah a jau sim kawm ua, la akipah ua, Joseph tung a abawl khiel dante khu akitheh khe ta uhi.

- 5. A Innkuon un aki mu khawm uhi :** Joseph in asanggamte sukhel a angaidam zou mama a, hichin agen hi. “Na sanggampa uh Aigupta ah na zuapa uh ka hi, hinanleh na hing zua upen lung himaw sih unlen, koi ma ki ngaw sih un, noute hundam ding a Pasian in ahing sawl masah kahi. tuabang a hing sawl masa khu noute na hi sih ua, Pasian ahi zaw hi” achita hi (Siem. 45:4-8).

Tuachiin a sanggamte anuakia ua, apa kung ah sil bangkim agen ua, hinanleh Jakob in aging ta sih hi. Atawp tawp in Joseph in apa sakolkangtalai apa athawt khu amu in a gingta ta a, Jakob lamkaina in mi 70 vel Aigupta ah apem lut ta uhi. Amuda pen un ahundampa uh ahi ta hi (Siem. 45:26-28).

Thuchiin:

“Ki ngaina thanghuoi taisan un, mihing khelna zousie pen tahsa pulam ahi, hinanleh kingaina thanghuoi bawl miin ama tahsa tungah sil abawlkhiel ahi.” I Korin. 6:18.

Dohna:

1. Jakob in ta bangzat anei ei?
2. Bangzieh a Joseph asanggamten amuda u e?
3. Joseph bangzieh a suongkul a kikhum ahiei?
4. Rachel ta tegel koi leh koi ahiei?
5. Joseph asanggamte kung ah aki phuonkhiet zou in bang agen ei?
6. Jakob lamkaina in mi bangzat Aigupta ah apemlut uoi?

.....

Zil diinjg - 9

MOSI HAT THU

Simding : Pawt. 3:1-13

Atup leh Angim : Israelte pui ding a hatna apom hi.

1. Pasian siltup mihing in a dal thei sih:

Mosi pa khu Amram leh anu Jokebed ahi. (Pawt. 6:20). Jacob leh atate mi 70 Aigupta gam a pmlut te khu ahing tam ta mama ua, Pharo in kidouna hing um kha leh imelmate uh i lang ah pang kha va uh chi a zauthawngta mama hi. Tuazieh in suhgenthei a, tang thei lou ding a siem ahing sawmta hi. Nichin in vahaibuan achil sah ua, akhente lougam nasep chinteng a sem sah uhi. Tua leh naupieng pasal phawtma tha ding achi hun lai in, Mosi ahing pieng ta hi. anu in ha thum sung a phuolgu a, phuolsel thei ding ahi nawnlou phet in, pumpeng naang phan in siinkhup khat in asiinkhup a, tui alut lou na ding in singnai in hoitah in a hawmnate atat a, nausen khu khum siinkhup sung a koi in, luigei a pumpeng lah ah aselta hi. Pharo tanu leh a suohte lui a kisil dia kuonte'n ava mu ua, tua bawm khu asuohte ahawnsahleh nausen khat akap ava mu ta ua, Lengpa tanun a lungsiet mama a, a ta ding in ala ta hi. Ana en gu Hebru nupi khat in tua nausen don ding in Mosi nu ava hatsah ta hi. Tam naungeh khu Mosi ahisah a, amin khietna “Tui a lahdoh” china ahi (Pawt. 2:1-10).

Mosi khu Aigupta gam mite pilna zousie zilsah in a um a, anasep leh asilbawlte athupi mama hi chi (Nasep. 7:22)

a Stephen in agen khu ahimai hi. Lengpa mun luo thei ding hinanlehzhong, Pasion mipite na sepsah a, amauh toh suhgenthei a um atel zaw hi (Heb.11:24-25). Thupieh jau um tah tah lah a Mosi khu Pasion in ahundoh zel hi.

2. Mosi ataimang:

Mosi anu'n aumpi lai in sil umdante ahil diim diam a, Hebru mi ahi aki thei chien mama hi. Achipite ganta banga asuhgenthei mai uh pen apawna mama hi. Nikhat Hebru mikhat leh Aigupta mi khat kisuol a mu a, Aigupta mipa pen that in avui ta hi (Pawt. 2:12). A zingni'n Israel mini kisuol amu kia a, phel sawm a ava zotlai in, khatpan Aigupta pa na tha bang a nei tha som e? achi hi. Mosi jong ajau mama a, Median gam a apu Jethro kung ah atai a, tuanah ateng ta hi.

3. Pasion in Mosi ahan hi:

Aigupta a nasemte, vengtuten Israel-te a suhgenthei mama zieh un Israelte'n Pharo kung ah thu atun ua, hinanleh a ngetna uh pen lawchin nahsang in a suhgenthei be nalai uhi. Tuachiin Israelte chimaw ta seng in Pasion kung ah thu a ngen uhi. Athungetna uh Pasion in ana sang a, tuachiin Pasion in Mosi sawl asawm ta hi.

Mosi in Belam aching zel a, a belum chinte hampa hing dup lah ah apui zel hi. Gamgaw tang lam pang a, Pasion tang 'Horeb' atun ding kuon in, Mosi in theubaw lah ah meikuong amu a, theubaw lah akang sih a, va enchien ding a ava naileh Pasion in "Mosi, Mosi" ahing chita hi. (Tam theubaw tutan in Sinai tang ah mu thei in a um nalai hi) Abrahamte, Isakte leh Jakobte kung a ana thuchiem ma bang in Israel Aigupta apat pui doh ding in Mosi khu ahan ta hi.

4. Mosi'n hamsa sakawm in, Pasion hatna ah apei hi : Mosi in Pasion sawlna khu a huphul mama a "Kei Pharoah kung a pei a, Israelte Aigupta a pat puidoh ding in kei khu koi ka hi ei? ale, koi e a hing sawlpa? hing na chi uh leh bangchin ka dawng diei? achi a, Pasion in "KEIMA KHU KEIMA KA

HI NA CHI DING HI” achia, Mosi in apei ding khu ahuphul mama a, vapei leng zong Israelte’n ana gingta ding un ka ging ta sih hi. Tuachiin Pasian in Mosi Chiengkhut Gul asuohsah a, amei ah amansah a, Chieng asuoh kia hi. A awm atham sah kia a, akhut phah bang in avam phengphung a, athamsah kia a, abei sieng kia hi. Israelte’n tam a gintat theilou uleh Mosi in Nail luidung a tui themkhat sawh in, tual ah abaw ding a tui khu sisan ang suoh ding hi.

Tambanga achi zou in zong Mosi in “Mi hamsiem lou dang awh ka hi” achi na lai a, Pasian in “Pei mai in” na kam kei ma’n ka umpi ding hi” achia, Mosi in “Hilou e, Mangpa midang sawl mai in” achi kia leu leu a, Pasian alungthahta a, ahileh na sanggampa mikamsiem Aron toh pei tan” achi kialeh Mosi a ut ta khongkhong hi.

Mosi in Pasian hatna aniel a, thamlouin ahuphul a, suonlam dang asiem zel a, hinanleh Pasian hatna apom apat in anua kia non sih hi. Atawp tan in amuolsuoh ta hi.

Thuchiin:

“Ginna in Mosi in ahing pichin nuain, Pharaoh tanu tapa chi a um ding a ut sih a,” Heb. 11:25.

Dohna:

1. Mosi nu leh pa min bang e?
2. Mosi anu’n ha bangzat aphuol gu ei?
3. Mosi min khietna bang e?
4. Mosi Pharoah in tha asawm in hei gam ah ataimang ei?
5. Pasian in Mosi hei mun ah ahan ei?
6. Bang bawl ding a Pasian in Mosi ahah ei?
7. Pasian in Kei khu bang ka hi achi ei?

.....

LAMKAI MIHANGSAN JOSHUA

Simding : Joshua 8:1,2,34' Num. 27:12-22

Atup leh Angim : Thuman khu hatna ahi.

1. Joshua sepai lamkai ding a guot ahi:

Joshua pa min khu NUN ahi. Amin masa khu Hoshea (Hundampa china) ahia, Mosi in, Joshua chi in ahan a, tua khu 'Jehova khu hundamna' china ahi (Min. 13:16). Aigupta gam apawtsan Rephidim mun ah a umlai in Amalek ten a hing dou ua, tua Amelekte dou ding in Mosi in Joshua khu lamkai ding in a guot hi. Mosi khu muol a achieng tawi in aban atung a, aban tun sung teng Israelte'n agalte uh azou ua, aban akia suh chieng in Amelek miten azou uhi. Aron leh Hur in Mosi suong tung ah atou sah ua, aban langkhat tuah in atu ta uhi. Tuachiin in Amelek miten azou non sih uhi.

2. Mosi'n ama panna mun a ding in Joshua aguot hi:

Gamdai a Mosi leh Aron in suongpi apat Israelte tui a pieh lai in, Pasian apahtawi sih ua, tuazieh in Pasian atung uah akipah sih a, Hor muol ah Aron ashi ta hi (Min. 20:27,28). Tuomi zou in Mosi zong ashi khiel khiel ta a, ama panmun a pang ding, aguot ding khat Pasian adong a, tuachiin siempu Eleazar leh mite ma ah, ama luong a pang ding in Joshua aguot a, hat tahleh hang tah a pang ding in zong a hanthawn hi.

3. Pasian thu azui zel:

Joshua in Israel tate Kanaan gam ah apuitung a, a un in a umkhawm sah a, anam uh tung ding diing Pasian siltup khu thu mang tah a supichin ding aguot hi. Pasian thupieh bang in Jordan lui akan ua (Joshua 3:16) Jerikou kulpi a suchim

ua (Joshua 6f:20), Ai khuo adou ua, Akan bawlkhiel na zieh in Israel mi tamtah in ashi law ua (Joshua 7:25). Tam thu ah Akan leh a innkuonpite suong in asepep lia uhi.

4. Gal adou ua, Aikhuo adou kia uh:

Joshua leh amite'n, Akan leh a innkote atha nua un, Aikhuo adou kia uhi. Joshua galdou asiem mama a, Galkap mi singthum khawpi nunglam ah ana pang sah a, adangteng aman a pui a, a khuo ua pat a ahing pawt chieng un, anunglam a ten khopi a umte that in, Inn ahal ding uh chi in aguoltuoh diam hi, Joshua umna leh Aikhuo kikal ah, guom aum a, tuanah ava kimu sah uhi. Azingni zingmawng in Aikhuo Lengpa a sepaite toh ahing kuon ua, tuomi kal in, Khawpi nunglam a ten khopi khu abulu ua, ahal ta uhi. Aikhuo lengpa leh amite khatzong hing hoilou in, athat gam sieng ta uhi.

Joshua in Ebal muol a suongpi tung a Mosi kung a Mangpa thupiehte agial a, mipite guol azawl a, Dan khu athei na ding un asim suoh a, Pasian thu bang tah a abawl zieh in, apei na lam teng ah guol a zou zel hi.

Thuchiin:

“Tualeh Mangpa'n Joshua kungah, “zau sinlen, lungke vawt sin, Thou inlen, galkap thei zousie pui inlen, Ai khuo ah kuontou in, Ngaiin Ai khuo leengpa leh amite leh akhuo leh agam, na khut ah ka hing peta hi.” Joshua 8:1.

Dohna:

1. Joshua minkhieha bang e?
2. Jehova khu bang china ahiei?
3. Mosi'n ama luong in koi apangsah ei?
4. Joshua gal adoulai a Mosi khut tu khu koi leh koi e?
5. Joshua leh amite'n koi gitlou zieh a gal alal uh e?
6. Joshua in Aikhawpi adoulai in, Khawpi nunglam ah Galkap bangzat akoi ei?

.....

Zil diinjg -11

HANNAH IN ATAPA PASIAN PIE

Simding : *I Samuel 1:24-28, 3:1-10.*

Atup leh Angim : *I silneite Pasian a pieh ding ahi.*

1. Hannah in tapa anngen:

Nidanglai in nupi khat aum a, amin khu Hannah ahi. Apasal khu Elkanah ahi. Hannah in ta anei sih a, ta nei ding khu atha nuom mama a, kum chin in Shiloh khuo ah Pasian be ding in apei zel uhi. Tuabanga apei zinglai un, miten atate uh Shiloh ah apui ua, Hannah in ta pui ding anei lou zieh in hasa asa thei mama hi. Khatvei Shiloh khuo ah Bieh inn ah ta ngen in thumna anei a, Pasian kung ah “Tapa na hing pieh leh adamsung teng Mangpa adi’n ka pe kia ding hi” chi in Pasian kung ah akichiem hi.

2. Hannah thumna Pasian in adawng:

Hannah thumna Pasian in ana ngaikhie a, alungsiet mama hi. Tuaziehin tapa pieh asawmta hi. Hannah khu a innlam ah apei a, tuachiin nau ahing pai ta hi. Kipah va na chi uai? Akipah mama ding ahi. Hun sawtlou in tapa khat ahing nei ta a, amin ding in “Samuel” ahi sah a, Samuel min khiet na khu “Mangpa ah ka ngen” china ahi. Hannah khu tapa anei zieh in akipah mama a, athum lai in “Tapa na hing pieh leh... bangchiin aki chaim ei? A thuchiem bangin Pasian adingin atapa pieh asawmta a, lunglut tah in akem/aching ta hi.

3. Hannah in atapa khu Pasian kung ah alankhie hi:

Nausen deihuoi tah mai Samuel khu ahing khanglien hiei hiei a, noi ahing ngawl ta a, nawi a ngawl phet in Hannah in Pasian pieh asawmta hi. Aki sata a, avan ken dingte asiem gel zou in, atapa khu apui a, Shiloh khuo zuan in apei ta uhi. Atapa Samuel khu naupang mama nalai ahi a, Bieh Inn ah ava pui ta hi. Tuanah Siempu Eli ana um a, Hannah in Siempu ? Eli kung ah “Tam naupang ngen a thumnu khu ka hi. Mangpan ka thumna asang a, tuazieh in ka hing lankhie ahi” achi hi. Samuel khu anaupang mama nalai a, anu’n apei san ta hi. Tuachiin Samuel in Pasian Bieh Inn ah Pasian na asem ta hi. Noute’n zong na neulai un Pasian na nasem thei uhi.

Thuchiin:

Suhdam a na um theina dingun na tatkhelnate uh thupha kitawituo chiet unlen, khat leh khat thu kingetpieh un. Mi dihtat thungetna in nna asem thei mama hi. Jacob 5:16.

Dohna:

1. Hannah pasal min bang e?
2. Samuel min khietna bang e?
3. Hannah in Pasian kung ah bang e anget?
4. Hannah in tapa Pasian kung a anget in bangchin angen ei?
5. Shiloh Biehinna a umpa Siempu khu koi e?
6. Hannah in athuchiem atudet zingna amah?

.....

Zil diinjg - 12

RUTH BOAZ LOU AH A KUON

Simding : *Ruth 2:1-23.*

Atup leh Angim : *Silpieh in itna aensah hi.*

1. Ruth leh Naomi:

Nidanglai in numei fel mama khat a um a, amin khu Ruth ahi. Apasal in asi san ahia, a pinu/apasal nu toh aum hi. Apasalnu khu Naomi ahi.

Ruth leh Naomi khu agenthei mama ua, sum leh pai zong anei sih ua, Bu pienna din lou zong anei sih ua, lungsiet ahuoi mama uhi.

Nikhat Ruth in api kung ah ‘Lou lam ah va pei ding a, ahing lungsiet pen pen, busang ka va sui ding hi aw’ achia, tuachiin, Ruth khu akuon ta hi. Akhuo ua mi hau mama Boaz lou ah ava kuon ta a, bulakhawmte leh bu-atte ana um ua, Ruth in bu atte kung ah, na bu at khahlou na nuasiete uh busang hing sui vang aw chi in a ngen ta hi. Tuachiin busang asuita hi.

2. Boaz alou ah vahaw:

Tomkhat zou in louneipa Boaz khu a lou ah ahing pei a, Ruth ahing mu ta a, Boaz in asuohte kung ah “Ama hei lang nungah e?” chiin adong a, asuohte’n “Moab nungah, Moab gam a pat a Naomi toh hing pei khu ahi. Hing lungsiet unlen, na busangte hing sui sah un chi in zingmawng apat a um ahi ta hi” achi

ta uhi. Tuachiin Boaz in Ruth alungsiet mama ta a, “Ka tanu mi lou ah busang sui in pei sin aw? Tamnah um zing in, abu atte uh en inlen, ahing nusia zel ding uhi” achia, tam thu azah in Ruth khu akipah mama a, Boaz kung ah kipah thu agen a, bohkhup in chibai abuh a, “Namdang ka hi ngal a, nang in na hing lungsiet pen bangchi dan ahia” achi a, akipah mama mai hi.

3. Ruth a innlam ah ki nuale:

Boaz in a bu atte kung ah “a lom ah na kante uh zong la unlen, Ruth pia un” achia, Ruth in bu nempi ala khawm a, kipah tah in a pi kung lam ah anua kia ta hi. Apinu’n, “Hei lang a busang sui na hei” chiin ana dong a, Ruth in “tuni na ka vases na khu Boaz lou ahi” achi a, Boaz phatdan leh ama alungsiet dan apinu ahil a, ka bu a at zou masang teng(tangvalte) bu atte kung ah ki lahkhawm in ahing chi hi, achia, Boaz in Ruth ana lungsiet zieh in Naomi akipah mama hi. Mi gentheite lungsiet khu Pasian kipah na lam tah ahi.

Thuchiin:

Koipou mi zawngte hepi miin, Mangpa leitawisah ahi a, asilpiehte Mangpa’n adinkia teitei ding hi. Thupil 19:17.

Dohna:

1. Ruth pinu min bang e?
2. Ruth khu koi lou ah ava kuon ei?
3. Ruth in Boaz khu bangchin chibai abuh ei?
4. Ruth khu heigam nungah ahiei?
5. Mi gentheite lungsiet khu koi kipahna lam tah ahiei?

.....

MEITHAI THAWLAWM

Simding : Mak 12:41-44.

Atup leh Angim : Pasion itte'n a nei zousie ape phal uhi.

1. Jesu leh anuazuite kikhawm uh:

Jesu leh anuazuite khaw tuom tuom ah azin koi koi ua, azin na lam ua, Pasianni chieng in aki khawm zel uhi.

Khatvei Jerusalem khuo ah ahaw ua, tuanah Biehinn thupi mama khat aum hi. Jesu leh anuazuite tua Biehinn ah kikhawm ding in apei ua, Biehinn mai ah thawlawm bawm gei ah atou hi. Biehinn kai ding a peiten tua bawm ah thawlawm akhie ua, Jesu'n ana enzing hi.

2. Mihausaten thawlawm pie uh:

Mihausu mama te zong Biehinn kai ding in ahing pei ua, thawlawm bawm umna lam ah ahing pei ua, thawlawm bawm ah sum tampipi ahing khe ging zua zua uhi. Jesu'n athawlawm piehte uh ana en zing a, apieh tam dan uh zong a un in ana mu a, mihausasaten apieh tam zieh un, Pasion khu kipah ding in agingta mai thei uhi.

3. Meithai migentheinu'n thawlawm apie hi:

Tuomi zou in meithai migenthei mama khat hing pei in, sum tomnou khat ahing tawi a, thawlawm bawm umna lam hing zuan in, asum nei sun khu thawlawm bawm ah ahing khe ta hi. A thawlawm khiet khu sumsanni ahia, tua khu paisa khat toh kibang ahi. Jesu'n meithainu sum pieh khu ana enzing a, apieh zat zong athei a(petom chiva chin na ging ta uai)

Jesu'n anuazuite kung ah “Thalawm bawm a khete lah ah tam meithainu'n akhe tam pen hi”.achia. Tuabanga agen na zieh pen ahi leh midangte'n a innlam uah tampi khat anei nalai ua,

meithainu'n innlamah bangma nei anei nonsih a, anei zousie
Pasian adingin ape sieng hi.

Eiten zong inei dan dan a Pasian ipieh ding uh ahi. Tua hileh
Pasian itung ah akipah ding a, guolzawlna chikim eite a ahi
ta ding hi.

Thuchiin:

*Michin in alungtang ua atup bangin pie heh, phallou sasa a
pieh ding ahi sih a, phut thaw banga ngai a pieh ding zong
ahisih hi, aziehpén Pasian in kipahtah a pemi a it hi.
II Korinht 9:7.*

Dohna:

1. Jesu anuazuite toh akikhawpna uh bang khuo e?
2. Meithainu'n thawlawm bawm ah bangzat akhie ei?
3. Meithainu'n sum dang anei nalai ei?
4. Mihausate'n bangchin thawlawm apie uoi?
5. Eite'n thawlawm bangchi pieh lei gawlzawlna chikim itang
thei diei?

.....

Zil diinjg -14

JESU JERUSALEM AH LENG BANG IN

Sim ding : *Mat.21:1-19; Mk. 11:1-16; Lk.11:28-40;*
Jakaria 9:9.

Atup leh Angim : *Jesu i pahtawi ding uh ahi.*

1. Jerusalem kut bawl na ah :

Nidanglai in Judaten paikan kut anei jel ua, mitampi apeikhawm jel uhi. Tua kut khu Jerusalem ah anei jel ua, khatvei Jesu jong anuajuite toh kut mang dingin akisa ua, akitha lop mama uhi. Tam peikan kut khu angaisang mama uhi. Pasian in suoh leh sal apat a apuidoh theina ding in belam si kitatna Israelte inn peikaan in sisan kitaatlouna Aigupta in a lut ahijieh in michin akipah mama ua, nuom zong asa thei mama uhi.

2. Olive muol tungah athum uhi :

Jesu leh anuajuite Olive muol tungah athum ua, tua mun apat in Jerusalem khu anai mama ta a, gal mu phah ahi phial ta hi. Jesun anuajuite ni ama sawl a, “na masang ua khuo ah vapai unlen tuanah Sabitung lah nailou namu ding uhi. Tua sabitung khu hing sut unlen tanah hing kai ta un. Min bang ding a na sut uh ahei chia ahing doh uleh Mangpan atulmaw hi” chi un achi hi.

3. Anuajuite apei uh :

Anuajuite khu apei ua, khuo ava lut ule Jesu gen bangin Sabitung lah nailou khu ava mu ta uhi. Sabitung kikhit khu ava sut/phel ule aneiten “Sabitung khu bang ding a na sut uh ahei” ahing chi ta ua, anuajuiten Mangpa gen bangin “Mangpan atulmaw hi” achi uhi. Tua bep in aneiten jong

aphal pieh ta ua, tuachin anuajuiten Sabitung ahing kai ta ua,
Mangpa kung ahing tut ta uhi.

4. Sabitung nou tung ah Jesu tuong :

A nuajuiten Sabitung khu Jesu kung ah hing kai tung bep
un Jesu khu atung ah atuang tahi. Mi nempí agei ah aum ua,
apei na ding ah apuante apha ua, Sabitung tung ah jong Jesu
tuanna ding in puan apha uhi. Puan neilouten jong nasei lampi
ah apha ua, nuomsa in akipah mama uhi.

5. Jerusalem ahing tung ta :

Olive muol khu ahing khel kuon un mipi jousia khu akipah
mama ua, Jesu hing pei kipahpina in a kikou uhi. Anua lam
leh ama lam apeite khu akikou zoizoi ua, Hosanna Hosanna
Mangpa min a hing pei khu phat in um ta hen, David gam
ahing tung ta, Pasian in guoljawlhen, tungnung sangpen ah
Hosanna chin akikou uhi.

Tuabangin lampi a jui duam duam ua, atawp khawng in
Jerusalem ahing tung ta uhi. Jesu khu Bieh inn ah alut a, mipi
ten zong ajui lut uhi. Eiten zong Jesu ipahtawi thei a, iman
leh Jesu thupina i phuonzah uh china ahi.

Thuchiin:

*“Na melma leh phubala mite, na sip sah theina dingin; nang
hing dote ziehin, naungehte leh nausen nawiteplaite kam a
kipat, hatna na sudetta hi.” Late 8:2*

Dohna:

1. Judaten peikan kut hei ah amang zel uai?
2. Nuazui mi niten bang e ava kai uh?
3. Sabitung tung a tuang khu koi e?
4. Mipite bang gen in aki kou uai?
5. Jesu Sabitungnou tung a atuan lai in mipiten bang apha uai?

.....

JESU'N A NUAZUITE ANN A NEHPI

Simding : *Math. 26:17-24; Mk. 14:12-26;
Lk. 22:6-23; John 13:1-30.*

Atup leh Angim : *Jesu'n anuajuite toh peikan kut
aman dan.*

1. **Kut annkuong luina:**

Peikan kut chieng in, innkuonte, lawmhoite chial in kut anjalui na a bawl jel ua, Jesu jong a nuajuiten kut anneh khawmpi a ut ua, ***“nang peikan ankuong imna ding heisung ah va bawl uleng na dei ei”***? chi'n adong ua, Jesun anuajuite ni asawl a, khawpi sung ah lut ulechin pasal khat tuibel tawi muva uchin, ama kung ah syepan ka nuajuite toh peikan annkuong ka immna ding hei sung ahiei chia dong ding in asawl a, tuapan ahing hil ding hi achia, tua pasal in pindan lienpi khat akohmu a tuanah peikan kut ankuong im na ding abawlta uhi.

2. **Jesun anuazuite kengsil:**

Tuachiin nitah lam in Peikan annkuong um ding in Jesu leh anuazuite a umkhawm ua, vumkhawl an anekhawm ta uhi. Ann aneh laitah un Jesu ading doh a, kuongkhat in tui adom a keng sia na puan ala a, anuazuite lah ah apei kual a, akeng uh abanban in asil sahta a, anuazuiten i lamkaipa un, suoh bang a ikeng uh asil achi ua, kidang asa mama uhi. Peter in vang akeng sil ding aphaal sih a, hinanleh Jesun a banban in a silsahta hi. Tuachiin ***“Jesun kei na lamkaipa un bawn nakeng uh kangsil sah leh, noute zong na keng uh na kisilsah ding uh ahi”*** achia. Tuaziehin Jesu nuazui ut pouma ten kingainiem tah a, na akisepsah tuo chiet ding uh ahi.

3. Ann aneta uh:

Tuami hun in Jesun, annpheng ala a, aguolzawl a, aphelsuo a nuazuite kung ah apie hi. La unla ne un. **“Tam khu ka tahsa ahi”** achia a nuazuiten ala ua ane uhi. Uain nou zong ala a nuomthu tut in akung uah apie a la un lan don un, tam khu ka sisan a thuhun tha khu ahi, mitampite a ding a khiel ngaidamna ding a hing luongkhie khu ahi” achia. Tuachiin Jesu anuazuite kung ah a annneh nukhie pen ahi ding ahi chi ahil hi. Dachiang in aman ding ua, akhailum ding uh chi athei a alungkham ta mama a **“na hing theizingna ding un bawl un”** achi zieh in anuazuiten a chiemte zingta uhi. Nidang a kipahtah a ann anekhawm uh abang nawnsih a, a lamkai pa un asi ding agen ziehiin a lungkhawm ta mama uhi. Ann aneh zou un Olive muol ah thumna neiding in apawt kheta uhi.

Jesun ama nuazuite kungah Mangpa nitah annkuong a impilai a athugen, bawzel ding a avaihah zieh in Hattuum ten athu anungzel ua, ei Hattuum inzong Mangpa Vumkhawl ann ibawzel uhi. Naupang kum 14 apat tunglam phal/sieng ahisah a, kum 15 apat tunglam danzoukim ten anethei ahi giap hi. Mangpa nitah ann khu ngai poimaw ding ahi. Nouten zong na hing pichin chieng un na hing ne ding uhi.

Thuchiin:

“Aziehpen tam tanghou na neh ua, tam nou nadawn tengun, ahing peikia masangsie Mangpa shina na phuongzah uh ahi.”
I Cor. 11:26

Dohna:

1. Jesu leh anuazuiten peikan kut annkuong imna heimun ah anei uai?
2. Annkuong a imlai un Jesun bang e agen?
3. Jesun anuazuite nehding in bang apie ei? Tualeh adon ding un bang apie ei?
4. Nuazuite bangzieh a ngui leh lungkham uh e?

.....

Zil diinjg - 16

JESU KHAILIA UH

Simding : *Math.26:36-39,47-55,27:11-15,32-38,45-54*

Athu in Angim : *Jesu thuohna theizing ding.*

1. Gethsmani huon ah Jesun thu ngen:

Jesu leh anuazuite Olive muol lam ah thumna nei ding in apei ua, a ann neh lai un tam annkuong a imm uh khu anu nungpen ahita chin agen a ashi ding ana thei ta tham hi. Lungkham tah in anuazuite toh apei ua, Gethsmani huon ava tungta ua, thu angen ua, Jesu khu apam deu ah a kikhin phei a lungkham seng seng in thu angen a, khumin ahing kinualeta uhi. A nuazuite athu ngetlai ua ana kimut tah un, Peter kungah naikal khat zong hing ngah zoulou lawm lawm nahi uh ahei achia. Lungkham seng seng in thumvei thu anget zou in a nuazuite kungah ***“Ngai un ahun ahing tungta hi mihing tapa khu migiloute khut ah matsah in a um ding hi. Thawu unlen ipei ding uhi, ahing man ding te ahing naita hi”*** achia.

2. Jesu man uh:

Tuabanga thu agen lai in amantu ding mipi ahing peikhawm ua, nidang in athugen ngaikhie ding in ahing pei ua, hinanleh tun vang Jesu khu silbawlkhiel ahichi in aheh ua, amat sawmta uhi. Namsau leh phawhbul tawi in ahing pei ua, Jesu khu amanta uhi. Peter in anamsau man in siempumang suohpa

abil langkhat a sattan piehta hi. Jesun Peter khu anamsau koi ding in thu apie a, siempumang suohpa bil zong a suhdam sahta hi. Ama mantu ding zong Jesun atheisa ahi. tuami zou in Jesu nuazuite azau ua, Jesu khu ataimang santa uhi.

3. Jesu shina:

Migiloute khu Judate ahi ua, adieh in a siempute uh ahi. Tamten vaihawmtu ma ah apui ua, zuou in aheh ua, amaw matna ding asui ua, hinanleh amuzousih ua, thu adong ua, Jesun adihna bangma agen utsih hi. Siempu mangpa in bangma gen utlou maw tam ten bangzieh a ahing heh e? achia, hinanleh Jesun bangma agen utsih hi. Pilat kung ah apui kia ua, ***“Jesu khu migilou ahi”*** achi ua, Pilat in Jesu khu hadoh ding anuom mama a hinanleh a panpi thei tuomsih hi. Pilat in Jesu khu bang law ding na chi uai chi in a dong a, mipiten ***“Kross a khetbeh ding ahi”*** achi ua, Pilat in ***“Bang khelna anei ei?”*** achi leh, mipiten ***“Kross a khetbeh ding ahi”*** chi in akikou zua zua uhi. A tawp tawp in law ngaina atheisih a kross a khetbeh ding in apekhe ta hi.

4. Kross ah khenbeh uh:

Pilat in a piekhiet zou in leng inn ah apuilut ua, apuante alah khiet pieh ua, puonsan asil sah ua, linglukhu alu ah akhusah ua, chiemnuina’n a zang uhi. Tuachiin kross a khetbeh ding in apui ta uhi. Zan khawvah a asuh genthei zie un Jesu khu agim mama ta a, aki khailia na ding kross a paw sah ua, apaw zousih a, Simon in kross khu apuah sah a, Golgotha kichina mun ah Jesu khu kross ah akhenbeh ta uhi. A lutung ah ***“Tam Judate Lengpa ahi”*** chi akigial hi.

5. Jesu ashi hi:

Jesu akhetbeh uh hun khu zingmawng ahia, sunkim laitah in khovel ah sim ahing ziing a, nitah dong in amial den a, Jesu aw ngaitah in akikou a, Eloi Eloi lam ah sabakthani achia, tua khu ka Pasian ***“ka Pasian bang ding a nei taisan ahei”***

china ahi. Tuachiin zilpi ahing ling a, suongpite hing pawhkeh in, hante ahing kihong hi. Jesu shini theizingna in eiten zong Good Friday imang zing uhi.

Thuchiin:

Hinanleh itatkhehnate ziehin Ama liemsahin a um a, igitlounate ziehin vuohsidup in a um hi; ilungmuonna dingun gawtna atungah atung a, akivuohna huoltaite ah suhdam in i umta hi. Isai 53:5.

Dohna:

1. Jesu leh anuazuiten hoi mun ah thu angen uai?
2. Jesu kross puahpipa khu koi e?
3. Jesu lutung ah bang akigiel ei?
4. Jesu aw ngaitah a akikou in bang agen ei?
5. Jesu shini theizingna khu bang akichi ei?

.....

Zil diinjg - 17

JESU A THOU KIATA

Simding : *Math. 18:1-10; Mk. 16:1-13*

Atup leh Angim : *Pasian khu bangkim bawlthei ahi.*

1. Han ah Jesu avui uh:

Jesu ashi in nitahlam ahia, anuazui khenkhat ten, amauh zong hing kikhailum va achi ua, ataisan ua, akhenten azui zel uhi.

Mikhat Joseph (Jesu pa min toh kibang) Arimathai khuo mi ahia, thuneitute kung ah Jesu luong khu ava ngena, Jesu khu a itt mama mai hi. Jesu luong khu ama han ah akoita uhi. Nidanglai in han khu suong in asin ua, tuabangin Jesu khu avui uhi. A kotkhah ding in suong lienpi khat a zang uhi. Hoitah in suong khu asitkhum ua, tuakhu avuidan uh ahi.

2. Jesu nuazuite:

Jesu nuazuite, alamkaipa uh ashi nua in athawmhau mama ta ua, hinanleh Jesu amat un amau zong amat tha ding lah azau mama uhi. Khawlni zou hapta nimasapen in numeite Jesu luong thaunamtui nu ding in zingmawng matah in a kuon uhi. Tuanah Mari leh Mari Magdalinte leh Jesu nuazui a ana pang numei khenkhatte ahi uhi. Kintah in Jesu han lam zuon in apei uhi.

3. Jesu han kihawng:

Lampi ah han kot bangchi i hon ding uoi chiin akidong tuo ua, abuai mama uhi. Jesu han ava tung ua, han khu kihawngsa in ava muta uhi. Tuachiin Mari Magdalin khu Peter leh Johan sil umdan hil ding in atai a, amaugel zong kinthei tawp in ahing pei uhi.

4. Jesu athawukia ta:

Mari Magdalin apei nua in hansung khu a en ut ua, lah azau ngal ua, hinanleh a et uleh Vansawlsieng hansung ah ana um a, jau in akithing uhi. Vansawlsieng in “Lungkamsih un Nazaret Jesu sui nahi uh. Tanah aum nawnsih, athawukia ta hi” achia, tuachiin a et uleh Jesu ana um nawnsih hi. Peter, Johan leh Mari Magdalin ahing tung ua, hankhu akihawng san amu ua, Jesu luong zong a um nawnsih a, tuachiin nuazui dangte hil dingin anuakieta uhi.

5. Mari Magdalin kung ah kihil masa:

Mari Magdalin khun Jesu luong min aguhmang hiva chin han ah kap kawm in a ding den tahi. Tualaitah in Jesu khu anunglam ah ahing pei a, hinanleh, Jesu ahilam atheisih hi. Jesun ahawupi a, “Numei bang dia kap nahei? koi e na sui? achia, hinanleh Jesun “Mari”chi in ahan a, hoi deu a a etleh Jesu ahi ahing thei tahi. Hebru ham in “Rabboni” achia tuakhu lamkai/thuhilpa china ahi. Mari Magdalin in Jesu khu Pasian in akaithawu hi chi athei in akipah mama a, midang hil kal angahla mama hi. Huchin mite kung ah agen zah tahi. Pasian in silbangkim abawlthei a, Jesu asisa zong akaithawu thei hi chi athei phet in kipahtah leh lungmuong tah in a um ta hi.

Thuchiin:

En in, “Na leengpa kingaangiem tahin sabiltung tungah, sabiltung nou tung ngei a tuong in, na kungah ahing pei chiin, Zion tanu hil in” chi khu. Math. 21:5,6

Dohna:

1. Jesu luong va ngenpa khu amin bang e?
2. Jesu han va en masa te khu koi koi e?
3. Mari Magdalin in Jesu hansung ah bang amu ei?
4. Jesu kaithaw a aum nua in koi kungah aki hil masapen ei?

.....

Zil diinjg - 18

JESU A KIHIL ZEL HI

Simding : *John 20:19-23; 21:1-14; Math.28:8-10;*
Mk.16:9-18; Lk.24:36-43

Atup leh Angim : *Akung uah Jesu a um zing hi.*

1. Athaw kia thu ginglel:

Jesu kaithaw a um in Mari Magdalin in aloite ahil a, hinanleh agingtasihi uhi. Jesu khu mukia ding anuom mama ua, hinanleh ashi tah ziehin thoukia ding in a gingta sih uhi. Jesu nuazuite mini zong mun dang a pei ding in apei ua, lampi a apei un, Jesu zong agei uah a pei a, akihoulim khawm uhi. Koi ahi chi atheisih ua, tomkhat zou in a Mangpa uh ahi chi ahing thei kheta uhi. Akipah mama ua, nuazui dangte kung a hil dingin ahing kinuale ta uhi. A lawmte kunga agen uleh agingta sih uhi. Akidang mama hi agintat theilou ukhu ahi.

2. A nuazuite umkhawm na ah kihil:

Jesu nuazuite Jerusalem ah a umkhawm ua, mitheilou ding in aguh in aki mukhawm zel uhi. Khatvei Jesu that ten hing man van hing that khava chin azau mama uhi. A umna uh inn khu kot hoitah in akil ua, awl nou nou in thu agen ua, tuabanga a umkhawm laitah un, Jesu khu a umkhawmna laitah uah ahing ding phut a, a nuazuiten kidang asa mama uhi. Jesun **“Natung uah, lungmuonna um taken”** chi in zaulou dingin thu ahil a, Jesu athawukia hi chi agintatlou zieh un ahawusie a, anah

asut nate akhut sia kila khet beh nate a ensah hi. Nuazuite khu akipah mama mai uhi.

3. Luipangah Jesu kihil:

Nichin a azui uh Jesu amu phah nawnlou zieh un nuazuite a lungkham mama ua, Peter in a lawmte kungah nga man in kapei ding hi achia, a lawmten zong azui uhi. Jesu damlai a abawl bang un Galili lui ah len aseph uhi. Zankhuo in alen uh aseph ua, hinanleh nga khat zong amansih uhi. A lungkham uh toh nga khat beh manlou nalai hahsa asa mama ding uh. Zingkal lam ahing hita a, tuahun tah in Jesu khu lui piau ah aum a, hinanleh Jesu ahilam atheisih uhi. Jesun ***“na kuong zietlam ah sep le uchin man va uteh”*** achia, Jesu thupieh bangin alen ase uleh aman tam taseng ua, alen nasan akai zou nonsih uhi. Tualaitah in Johan in luigei ami khu a en zing a, Jesu ahi chi athei khe taphut a, Peter kungah ***“Jesu ahi khula”*** achia Peter khu kindeu in kuong apat in atomkhie a, Jesu umna lam zuon a pheih a, Jesu a mutah in akipah mama mai hi. Tuachin annpheng leh ngate ne in a kihoulum ua, alungmuong mama uhi. Jesu khu heimun hizong leh a umthei hi chi athei un aha muong mama ta uhi.

Thuchiin:

“Tuazieh in pei unlen, namchin apat nuazui ding bawl unlen, Pa leh Tapa leh Hagusienngthou min in baptis unlen; 20thu ka hing piehte zousie zui dingin thu hil un, tualeh ngai un, Kei bangchih tan in, leitung tawp dongin na kung uah ka um ding hi, achi hi.” Amen. (Mathiu 28:19)

Dohna:

1. Jesu athoukia hi chi atung in anuazuiten agingta uai?
2. Nuazuite kung akihil in Jesun bangchin agen ei?
3. Nuazuiten Jesu thupieh banga len ase un nga aman uai?
4. Peter in Jesu athei in bangchin aum ei?

.....

Zil diinjg -19

JESU ADIA MI GIN-UM KHENKHATTE

Simding : John.3:1-13; 7:50-53

Atup leh Angim : Jesu adia mi gin-umte khu polam etna ah kilangsih nanleh miphattuom ahi uhi.

1. Pharisaite lah ah Nikodem:

Jesu damlai in mihausa mama khat Nikodem kichi khat aum a, ama khu Judate vaihawmna sangpen pen ah atelkha hi. Nikodem min khietna khu “mipite joutu” china ahi. Amakhu Pharisa mi ahi. Pharisa khietna khu “Kituom bawl pawl” china ahi. Pasion lekhabu in bawl ding achi leh bawllou ding achi zousie akilang thei zousie, bawlkim asawm ua, a lungsimte uh asiengthawu siengsih hi. Tuaziehin Pharisaiten Jesu sil kidang a bawlte zieh in miten athupi ngaizieh leh, Pharisaite polang ah akisusieng ua, asunglam uh aniah dante hangsan tah in agen zel hi. Tamte ziehin Jesu khu Pharisaiten amuda mama uhi. Jesun nou Pharisa mi gilloute chi in polang kilahdan in nahoi uhi chi in hangsantah in a hawusia zel hi, zong ahindan uh ahi hi. Thamlouin akiliensah mama uhi. Tuate lah ah Nikodem zong apang hi.

2. Nikodem zanlai in Jesu kung ah pei:

Pharisaite'n Jesu khu aman ua, vaihawm na ah dingsah ua, siemloutanna ding nasatah in a ngaituo ua, tuahunlai in avaihawm na uh sangpen pen Sanhedrin achina ua pangpha Nikodem in Jesu khu mu anuom mama a, zankhat aloite Pharisaite theilou kal in Jesu kung ah aguh in avahaw a, Jesu kungah **“Rabbi”** Pasion hingsawl sia khat na hichi ka hingthei hi. ***“Pasion umpilou in, koiman sil kilimdang na bawlte bawltheisih va”*** achia, Jesun vangam kaithei na lampi anahil hi.

3. Nikodem in Jesu aguh in panpi hi:

Pharisaiten Jesu khu amuda deudeu ta ua, Jesun anuazui ding mi ahau deudeu tahi. Tuachin Pharisaiten sepaite Jesu man ding asawl ua, sepaiten Jesu thugen angaikhiet chieng un hoi asa mama uhi. Tuaziehin manlou in ahing ki nungle kia uhi. Pharisaiten bang ding a hing manlou uh e chia adoh uleh, Nikodem zong tuate lah a pang ahi. Nikodem in alawmte kungah ***“ama ihuo ua, athugen leh a silbawl ten idan uh akal ei”*** chi in alawmte dihlouna agen hi.

4. Pharisaiten Nikodem huo uh:

Tuabang a aguh a Nikodem in Jesu apanpi pen, Pharisaiten athei un ahuo mama uhi. Nang zong Galili mi nahi maw? Nang zong Jesu pawl te nahi maw? Bible in zong Jawlnei Galili gam ah hing pawtva chin agen amah? a umsih hi achi ua, Pharisaiten Bible athei siemlou zieh uh ahi. Tuachin Nikodem alaw ngaina atheisih ua innlam ah a peisanta uhi.

5. Nikodem in Jesu luong nu ding thau namtui apieh:

Jesu avui un Nikodem zong apang a, Jesu luong nu ding thau

Murra leh Aloe khu sil gimtui damdoi mantam, vun natna bawlphat nate gimnamtui kichi na ah zong apang hi. Nikodem khu mihausa mama ahia, Jesu ding in kiphaltah in apengam hi, zong aguh in Jesu apanpi hi.

Thuchiin:

Koipou mite masang a hing hum pouma, ken zong van a ka pa mai ah, ama ka hum ding hi. 33 Hinanleh koipou mite mai a, kei hing kilepsan pouma Ken zong van a ka Pa masang ah ka kilepsan ding hi. Math. 10:32-33.

Dohna:

1. Nikodem min khietna bang e?
2. Pharisai a khietna bang e?
3. Nikodem Jesu kung ah ava haw in bang agen ei?
4. Nikodem in Jesu luong nuu ding in bang leh bang atawi ei?

.....

Zil diinjg - 20

SAWLTAH PAUL

Simding : Nasepte 9:1-12

Atup leh Angim : Jesu'n melmate, alawm ding in asiem hi.

1. Paul Jesu melma:

Jesu hunlai in tangval khat lekha siem mama leh dan thei mikhat aum hi. Tuapan Juda sakhuo a ngai thupi mama hi. Jesu thuhil ana ngaisang pawl ana um ua, Khrist juitu chi in akigen uhi. tuate khu Khristian zong achi uhi. Khristian chi khu Khrist nuazuite china ahi. Tuomiten Juda sakhuo khu suhlamdang a ut ua, ***“Jesu khu Pasian tapa ahia, Pasian zong ahi, hundampa zong ahi hi”*** achi uhi. tuabang a akihilna uh khu tangval laisiempa'n apom theisih hi. Khristiante khu suhmangthai asom ta a, suongkul a khum ding ahi achia, solkal kung ah amat theina ding uh phalna angen tahi. Tuachiin Khristiante mat a, suongkul a khum dingin asui ta vapual hi. Tuabang a Jesu nuazuite suhmangthai sawmpa khu Jesu melma ahi.

2. Paul min, apienna leh atenna:

Tuahun a Jesu leh anauzuite melma pa khu Paul ahi, amin khietna khu ***“Mi neu”*** china ahi. Paul in min ni anei a, khatpen ahileh Saul ahi. Apienna leh a khanletna khu ***“Tarsa”*** ahi. Tarsa khuo khu Cilicia gam a um summet bawlina mun thupi mama leh minthangtah ahi.

3. Jesu'n Paul a hawupi:

Tuabanga Paul in Jesu gingtute suongkul a khum ding a mat sawm a avah koi lai in, nikhat Damaska lam zuanin apei a, Damaska khuo atun kuon in “Vah thupi tah in ahing sal a, Paul khu a salpuata hi. Tuachiin aw gingkhat a za ta a, tua aw in “Saul, Saul, bang ding a nahing suhgenthei e? a hing chita hi. Paul in ***“Mangpa koi na hiei”*** chi in a dongta a. Jesu'n ***“na suhgenthei Jesu kahi, thawu inlen khuo ah lut inlen, na bawl ding ka hing hil ding hi”*** achita hi. Tuachin a hing thawu a, amit a hah leh bangma a muthei tasih hi. A loiten zong aw ging khu aza chiet uhi. Hinanleh bangma amusih uhi. Tuachiin aloite'n Damaska khuo ah apuita uhi.

4. Paul khu lawm ahing hita:

Damaska khuo ah Jesu nuazui mikhat, Anania kichi aum a, tuomipa khu Paul mit suhvah sah diing in Pasian in asawl hi. Anania in Pasian kung ah ***‘Mangpa tampa in Jerusalem a na misiengthawute nasatah in asugenthei hi chi mi tam tah in athei ten ua, tamna zong nangma lam a mite zousie zong mat theina ding Siempu mangte phalna nei a hing pei ahi hi’*** achi hi. Hinanleh Pasian in Anania khu Paul umna a vapei in, amit asuhvahsa tahi. Tuami ziehin Paul in Jesu agingta a, Baptisma atang a, Jesu lawm hoitah ahing hita hi.

Thuchiin:

Hinanleh kenvang na kung uah ka gen ahi, na melmate uh it unlen, nou hing bawlseta thungetpieh un. Math. 5:44

Dohna:

1. Jesu sugentheipa khu koi ahiei?
2. Paul amin masapen bang ahiei?
3. Paul mit suvahsa pa min bang e?
4. Paul Vah in asal in, Aw in bang agen ei?

.....

Zil diinjg - 21

PHILIP

Simding : Nas.6:1-6; 8:5-8; 26:40; 21:8-9

Atup leh Angim : *Gingtu hoitah khu apei na langah Jesu adingin phattuom angai hi.*

1. Hattuom Upa Philip:

Philip khu Juda mi ahia, aham zah ahileh Grik ahi. Nidanglai in Philip pen Pasian thu awi ana hisih hi. Jesu Hundampa a apom apat in Jesu nuazui gin umtah ahing hita hi. Hattuom kipat lai in bieh inn kichileh Hattuom Upa chi ana umsih hi. Jesu nuazuite zong mi inn lah pou ah akikhawm zel uhi. Hattuom hing pungzel in Hattuom lamkai ding leh Upa ding misagi atelkhie uhi. Tuate lah ah Philip zong Upa khat in apang hi. tua hunlai in Hattuomte khu innkuon khat bang in a um uhi. Asil neite uh akitang ua, sum hing kipete zong hoitah in akem uhi. Philip leh a lawmten tuabang na khu anasep uh ahi. Amun khu Jerusalem khawpi ahi.

2. Mangpa hagau in Philip sawl:

Khatvei Africa khuo gei ah Ethawpia gam lengnu sum enkolpa khu Jerusalem a Pasian bia in apei a, anua kia lam in thu hunlui Bible sakol kangtalai tungah asim kom a, tuahun in Mangpa hagau in Philip khu tuapa vahawupi ding in asawl a, Philip in tuapa avanai a, ***“na simkhu akhietna na thei ei”*** chin adongta hi. Lengnu sum enkawltu pan, ***“Koiman la hing hillou a bang kachi thei diei”*** chia a Bible sim nalaitah khu Pasian Jolnei Isai in Jesu pien masang peh a Jesu tanchin ana genloh thu ahi.

3. Philip in Pasian thu hilchien:

Tuachiin Philip khu Sakol kangtalai tungah lengnu sum kempa Bible sim khu ahilchienta hi. Pasiaan in atapa khovel hundam ding a ahing sawl ding thu, Jesu khu Pasian tapa ngei ahi dante mizousie gotmun peiding alungsiet seng ziehin atapa ahingsawl ding thute Jesu khu ithuoh ding tang a kross a akhetbeh ding thute, miten abawlsieta, asimmaw dan ding thute, asinua a hagau van a apeidan ding thute Philip in ahilchien tahi. Tua mipan kidang asa mama a, Pasian agintat law tahi. A lampi ua, tui a um a, sumkempan Philip kungah “envoi tuanah tui a um hi” Baptisma katang ding hi, bang in ahing dal ei achia, tuachiin Philip in Baptisma atangsah tahi.

4. Damloute asudam hi:

Philip in sumkempa Baptisma atansah zou in Mangpa hagau in apui a, apei nateng ah phattuom ngaitah in Jesu tanchin agen hi. Khatvei Samari khuo ah Pasian thugen in apei a, tuanah hagau bua nei tamtah a um hi. Philip in asung ua, hagau bua adel doh piehta hi. tuachin asung ua hagau bua pawtdoh a mihing hin ngaibang in a umta uhi. tualeh phalsi leh kengbaite zong asudam hi. Philip in apei nateng ah phattuom ngaitahin Pasian thu agen zel hi.

Thuchiin:

Hinanleh Philip in Pasian leenggam thu leh Jesu Khrist min agen khu, agintat tahun numei leh pasalten baptisma atangta uhi. Nas. 8:12

Dohna:

1. Mangpa hagau in Philip khu koi hawupi dingin asawl ei?
2. Philip in Lengnu sumkempa khu bang e ahilchien? Tualeh ahilchetna gen in.
3. Philip in bang natna e asuhdam?

.....

KORNELIA

Simding : Nas. 10:1-43

*Atup leh Angim : Jesu adia mi gin-umte khu, bangmi
hinanleh Jesun angaisah hi.*

1. Rom sepai lamkai:

Kornelia khu sepai lamkai khat ahia, akhuo ahileh Rom sawlkal munpi Kaisaria ahi. Rom mite khu Juda ahilouzieh un Judaten Zentel achi uhi. Judaten Zentelte khu Pasian hing belou ganhing bangin angaituo uhi. Amusit mama ua, Pasian in zong adei ding in zong angaitua theisih uhi. Milim be nam chin angainiam mama uhi.

Kornelia khu Juda nam hisih nanlezong Pasian khat a um hi chi agingta hi. Judate kikhawpna Sinagog achi ua, a innkuon un Pasian a bie ua, Pasian ah zong silpiehte alan zel hi. Migenthei alungsiet mama ziehin anei-le-lamte tamtah apezel hi. Miten zong Kornilia khu angaina mama uhi.

2. Simon Peter van sawlsieng in han:

Kornelia amatang a aum lai in amang bang in Pasian vansawlsieng akungah hing kihil in Kornelia achia, na thunget leh itna nasepte ziehin Pasian alungdam hi. Na ngetna sang ding in Pasian kimansan a umhi achia, tu in Joppa khuo ah

Simon Peter kichi vahan ding in namite sawl in, Simon Peter kichi tuipi gei ah Simon kichi savun nasempa kung ah jintung ahi. Tam agen zou in vansawlsieng apei mangta hi. Kornelia in asepai te ni asawl a, tuachin apei ua lampi ah zan khat agieh ua, azing ni nai 12 in Joppa khuo atungta uhi.

3. Simon Peter silmu:

Kornelia misawlte Joppa khuo avatun kuon un, amihat ding pa uh Simon Peter khu pindan a thumna nei ding in alut a, amit asing a, mumang bang in sil zousie amu hi. Bawm lienpi khat ningli nei khau a van apat kikhai khesuh amu a, tua bawm sungah ganhing chikim a um hi. Simon Peter kung ah aw in “Peter thou in that inlen ne in” achia Peter in “Mangpa dan dungzui a sienglou leh buate nesih vang achia”, hinanleh Mangpa aw in “Pasian in asieng hi achi, nang in bang ding a sienglou na chi e” achia, tuazou in bawmkhu van lam ah lahtouin a um tahi. Kornelia misawl ten Peter avamu ua, tuomun ah zankhat gieh in azing nin Peter toh azawhta uhi.

4. Pasian in deisah tuom aneisah:

A zing ni in Kornelia misawlte leh Simon Peter Kornelia inn lam zuonin ahing pei uhi. Lamkal ah zankhat ahing gieh ua, azing ni in Korneliate inn ahing tungta uhi. Kornelia in Peter khu bohkhup in chibai abuh hi. Peter inn sung avalut leh Kornelia innkuonte leh a lawmte ana um ua, Peter in Pasian thu agen pai a, “Pasian in deisah tuom aneisah hi, bang nam a mi hinanleh zong Ama deibanga hinkhuo zangte khu Pasian in akipahpi mama hi”.

Kornelia leh a innkuonpiten Peter thugen sung in hagau siengthawu anatang ua, hamtheilou in ana ham ua, tuachin a innkuon un Baptisma atangta uhi. Ni bangzat ahei khat tuanah

Peter a taam a, Pasion thu agen zel hi.

Thuchiin:

Pasion in Israel tate kunga, a thu vaihah, Jesu Khrist tungtawna lungmuonna thu agen khu. Jesu khu mi zousie Mangpa ahi. Nas. 10:36

Dohna:

1. Rom sepai lamkaipa Pasion thu awipa min khu bang e?
2. Kornelia in sepai te koi kungah asawl ei?
3. Peter in bang mang amu ei?
4. Peter in Kornelia inn ah bang e agen?

.....

BARNABAS

Simding : *Nasepte 4:36-37; 9:6-27; 11:14; 13:13,15; 15:35-41*

Atup leh Angim : *Khristian gin umte khu mikiphal leh mi lungsim lien ahi.*

1. Barnaba mikiphal:

I zil masatna a, Khristian masaten anei leh a lamte uh sawлтаhte apekhawm uhi, chi izil ta uhi. Anei leh alamte uh akihawm dial dial uhi chi zong izil uhi. Anania leh Saphiriate nupa in agam uh man akimkhat alep guh zieh un asi law uhi. Barnaba khu mihoi leh mikiphal ahi. Barnaba min khu ‘ Hamuonpa/ hanthawnpa’ china ahi. amakhu Juda khuo Kupra khuo a um Levi mi ahi. Hattuum kiphu chil lai in asil zuoh mante uh kintah in hattuumte ding in apie uhi. Aneh guh ut uleh koiman a theisih ding hi. Sil dihlou bawl khu Pasian deilou lam ahi chi athei ua, dihtah in ape kimsipsep uhi.

2. Barnaba mihoi:

Barnaba khu mikiphal leh mi nunnem, mifel ahi. Miki phal zousie khu mi gin um ahisih a, hinanleh Barnaba khu gensiet bei ahi. Hattuumten hagau siengthawu theisahna dungzui in Paul toh mun gamla tah tah azin dingin asawl a, apeina ding uh kuong/long bang angai a, a peina mun dingte zong hahsatna, gentheina umding chi zong theiphah ahisih a, huphul huoi tamtah umnanleh zong Barnaba khu Hattuumte

sawl ahipouleh apeizel hi. Paul toh azin koi koi ua, amauh kithuopi ding in Mak apui ua, gensenglou hahsatna tampi atuoh uhi. Amaute lah a Paul khu lamkai in apangsah uhi. Thugen na zong Paul ngen atangsah uhi. Barnaba in thugenna katangsih chin zong a phun ngaisih hi. Tuabang mi khu Pasian a gin um, Hattuumte ading a zong mi deihuoi ahi.

3. Barnaba mi lungsim lien:

Barnaba tung tangah chiemte ding leh theituoh khat a um hi. Tua khu ama milungsim lien ahi. Paul toh azin un John Mak apui uhi Azin lahlaw laitah un, John Mak in Perga khuo a pat in anuasietah hi. Paul in angaisiem sih khopmai hi. Tuazou in Paul leh Barnaba zin kia ding in ahing kisa kia ua, koitoh i zoh diei chin akidong ua, Barnaba in John Mak toh zoh a ut a, hinanleh Paul a ut nawnsih hi. azieh ahileh hing taisan kia khava chin a zau hi. Barnaba in akipuikialou leh ki theisiemlouna um den ding a zau a, lungsim lienpipua in mundang ah azin pi tahi.

Barnaba khu Khristian masate lah a mihoi leh ginum, miki phal leh lungsim lien ahi. Ama apat in zil ding tampi a um hi. Tunin naupangte zong Barnaba bangin i lungsim i siemhoi thei ahi.

Thuchiin:

Hinanleh sil hoi bawl leh na neisa uh mite hop ding manghil sih un, aziehpén tuabang kithoina sillatte ah Pasian akipah mama hi. Heb.13:16

Dohna:

1. Barnaba min khietna bang e?
2. Barnaba tenna khuo bang e?
3. Barnaba kiphaldan bangchin nathei ei?
4. Paul leh Barnaba in akhuolzín na ua apui uh koi e?
5. Barnaba amizie point 4 gen in.

.....

Zil diinjg - 24

JOHAN MAK

*Simding : Nasepte 12:11,12,25; 13:13; IITim.4:11
IPeter 5:13*

*Atup leh Angim : Pasian nasemte panpi khu nasep
thupitah ahi.*

1. Johan Mak:

Johan Mak in Pasian nasemte apanpi zel hi. Anu min khu Mari ahi. Johan Mak umna khuo khu tutan a ina theizing uh Jerusalem khawpi ahi. Johan Mak min khietna khu Johan chi khu ‘Jehova mihepi thei tah’ china ahi. Mak ahileh Sehlien (sia khenna seh) china ahi. Johan khu Juda min ahia, Mak ahileh Rom min ahi. Thuhuntah a Mak gieltu ahi.

2. Paul leh Barnaba apanpi:

Johan Mak leh anu Mari khu Khristian masate ahi ua, Khristian masaten Biehinn zong aneish ua, mi inn ah akikhawm zel uhi. Jerusalem a John Makte inn ah akikhawm zel ua, tua hun lai in Johan Mak khu kum 25 vel mi hi inn akigen a, Pasian nasemte ding a mi phattuom mama ahi. Tua hunlai in Pasian nasem thupi mama khu Paul ahia, Paul in lawmhoitah Barnaba anei a, atanchin uh zong izilta ua, Khantanhoi genna ah Paul leh Barnaba a khuolzina masapen uh Johan Mak in azui hi. Paul leh Barnaba akhuolzina lam ua, zintun mun hi leh thugenna mun hileh theitawp in ana panpi zel hi.

3. Johan Mak in Barnaba a panpi:

Johan Mak in Barnaba a zui lai in Pamphilia gam a Perga khuo ah ni bangzat ahei atham nua un, Johan Mak khu alung hel deu zong ahi maithei a, Jerusalem lam ah apeisan a, tuomi zou in Paul leh Barnaba khuol azin kia ding un Paul in Johan Mark khu khuolzinpi dingin angai nawnsih hi. Barnaba in angai mama a, tuaziehin Paul leh Barnaba khu mun tuomtuom ah azin lawta uhi. Barnaba in Joham Mak apui a, Kupra khuo lam ah azin ta uhi. Barnaba khu panpi thei tawp in apanpi hi. Tua hunlai in Paul in Johan Mak khu ngaina sih nanlezong Paul Rom suongkul atan lai in, Johan Mak in apanpi a, tuaziehin Paul in Johan Mak khu angaina kia a zong a lungsiet mama hi.

4. Johan Mak in Peter panpi:

Johan Mak in Pasian nasemtu Peter zong nasatah in ana panpi a, Peter khu nuazuite lah a mikhat ahia, Johan Mak in Peter Pasian thugen a akhuol zinna ah azui zel a, Peter ham zah Aramiak ham miten athei siemlou ziehin Johan Mark khu ham let in apang zel hi. Tualeh Peter nasepna Khantanhoi zong agelsah zel a, tuabangin phattuomna tampi ana nei hi. Khantanhoi Mak geltu zong ahiziehin tutan in Jesu khantanhoi eiten ithei law ua, eite dingin zong mi phattuom mama ahing hita hi.

Thuchiin:

Luke maimai ka kungah a um hi, Mak hing chiel inlen, hing zawpi in, nasepna lam ah ama kei a dingin aphatuom mama hi. II Tim. 4:11

Dohna:

1. Johan Mak min khietna bang e?
2. Johan Mak nu min bang e?
3. Johan Mak in Peter bangchin a panpi ei?
4. Peter in bang ham azang ei?

.....

Zil diinjg -25

PRISLA LEH AKUILA

Simding : *Nasepte 18:1-4; 18,19; 24-26;*
Rom 16:3-5

Atup leh Angim : *Pasian nasem ding in nupa kithutuoh*
khu ahoi ahi.

1. **Prisla leh Akuilate Nupa:**

Nidanglai a hattuum akiphu pat lai in, Nupa ki it mama , kigop thei mama leh kithutuoh mama a um ua, a pasal min khu Akuila ahia, a numei min khu Prisla ahi. A mauh Rom khawpi a teng ahi uhi. Tuana pat in khaw tuomtuom ah apem kawikawi ua, atawp in Rom khawpi ma atung kia uhi. A nehsuina uh ahileh “Puonbuh bawl” ahi. Amauh gel nupa khu nupa deihuoi tah ahi uhi. Hattuum nna lunglut tah in asem khawm uhi. Amauh gel bang in nupa kithutuo lei innsung anop mama ding ahi.

2. **Anupa un zin ahoi bawl uhi:**

Akuilate nupa khu hei mun ah teng nan leh uh zong zin angai poimaw mama ua, zong ahoi bawl mama uhi. Korinth khuo a aten lai un Sawltah Paul ahing khuolzina, Paul khu Khristian masate lah a thugen minthang mama ahia, khantanhoi thugen in khaw tuomtuom ah apei kawikawi a, khaw khenkhat ah sawt pipi atham den a, tuabang a a zin anivei na ah Akuila leh Prisla te nupate inn ah ahing zintung hi. Tuanah kum khat leh

hagup atham hi. Amauh gel nupa'n Paul nasep a ana panpi zieh un Korinth khuo ah Paul in hatttuom hoitah aphut khie hi.

Anupa ua Ephesa khawpi a aten lai un, Pasian thugen Apollo a inn ua ava zintung a, amauh gel nupa in ahoi theitawp in a zinpa uh ana bawl uhi. Apollo Pasian thugen hinanleh zong, Pasian thu atheichienloute amauh gel nupa'n ana hilchien sah zel uhi. A poimawna mun ah amauh gel nupa in Jesu khantanhoi agen zel uhi. Apollo in amauh gel nupa khu a phattuompi thei mama hi.

3. Paul khuol azin hi:

Paul khu kumkhat leh akim Akuila te nupa inn a a um nua in, mundang ah azin kia a, Akuila leh Prisla te nupa'n zong azinna ah azui uhi. Tuachiin Ephesa khuo todong in ava zui uhi. Ephesa khuo ah hatttuom hoitah ava phutkhie uhi. Amauh gel nupa in Paul khu nasatah in apanpi uhi.

4. Hatttuom, Akuila leh Prisla te inn ah kikhawm uh:

Nidanglai in Pasian Biehna inn chi zong aneisih ua, Akuila leh Prisla te aten ten na ua, hatttuomten kikhopna in a inn uh azang uhi. Inn khu kikhawpna ding in sil hamsa tah ahi. Inn lien mama angai a, touna ding angai a, khatvei leh ne leh dawn ding zong ngaituo angai hi. Inn nei kitup mi hi angai a, mi phun hatlou hi angai a, mi lamdon zong siem angai a, thamlou in innsung ania ut mama nalai a, mi hoiloute ding a sil hamsa mama ahi. Hinanleh zong Akuila leh Prisla te nupa'n mi ahoi theitawp in ana lamdawn ua, mite kipah tah in ana hawupi in, thamlou in a inn uh Hatttuomte kikhawpna

ding in apha! mama uhi. Amauh gel bang a nupa kituoh leh Pasion adia kizang te khu Pasion in zong a kipahpi mama ding ahi.

Thuchiin:

Mikhualte hoibawl ding manghil sih un, tuabanga bawl in mi pawlkhatten theilou kaal in vansawlsiengte ana zintun uhi. Heb.13:2.

Dohna:

1. Akuilate nupa khu bang chi bang mi ahi uai?
2. Paul Akuilate inn ah kum bangzat ha bangzat atham ei?
3. Nidanglai in Hattuumte'n koi inn ahiei kikhawpna a azah uh?
4. Paul koi khuo ah hattuum ava phut ei?

.....

JOHN CALVIN

Simding : *Deut. 6:1-9*

Atup leh Angim : *Khristian lamkai etton tah.*

1. John Calvin hun masa:

John Calvin khu French mi ahi. 1509 kum in French mallam Picardy bial a Noyon khuo ah apieng a, apa khu mi thupi mama mi hausa mama ahi. Bishop Secretary in apang phaphial hi. Anu zong French mi ahia, mi melhoi, mifel leh sakhuo mi hina neitah ahi. Hinanleh Calvin khu anu'n aneu lai in ashisan hi. Calvin khu apa'n sakhuo lampang a zilsah a, Hattuum panpina (stipend) zong amusah hi. Siempute kung ah akoi a, Paris khawpi ah lekha asim sah hi. Tomkhat zou in apan Dan (law) azil sah nuom ziehin a school kaina apat in ala khie hi. 1528 kum in Orleans School lientah ah akaisah kia, a , Calvin in Latin ham te, Grik hamte a zil a, asiem thei mama hi. Paris University apat in M.A. a passed zou in Orleans leh Bourges University ah hun sawt kuomtah lai asim kia hi. Apa'n vangsiet huoitah in 1531 kum in ashisan phut a, tuachiin Dan (law) azillai khu atawpsan ta hi. Tuachiin Paris ah a nuakia a tua hunlai a mi siem "Humanist" kichite lah ah hun bangtan ahei khat lai asim kia hi.

2. Calvin a piengtha:

Calvin lawmlui Nicholas Cop khu Paris University ah sangsie ahia, Calvin in athei in ava kimupi a, Nicholas Cop khu Protestant ahia, aman Calvin khu Protestant (Ei Khristiante) sakhuo bieh dan ana hil a, tuachiin Calvin zong ahing piengtha tahi. Tuachiin Calvin in Protestant Thuginpi azil a, apomdet tahi. A lawmpa Nicholas Cop toh Protestant Thuginpi mite kung a athezah zieh un, Catholic ten alah ua kipatin a notdohta uhi.

3. Geneva ah Calvin nasepna:

John Calvin khu anawdoh zou in Basel khuo ah alut phawt a, lekha simleh gel lamah akizang phawt hi. Lekhabu minthang tah ‘khristian sakhuo din dan’ (The Institutes of the Christian Religion) chi lekhabu kum 1536 March ha in asuo doh a, tua lekhabu khu Protestant Thuginpi ding a agel ahi hi. French gam a leng Francis I khatna sim ding a agel ahi hi. French gam a miten adeisih khawp mai ua, kum 1542 in tam lekhabu ahaltum ta uhi. Hinanleh tam lekhabu ahoi seng zieh in 25 vei a sun kia uhi.

Calvin khu Farel in achielna bang in Geneva ah Pasian nasem ding in a um a, Bible mi hiltu in apang hi. Tuanah Farel toh semkhawm in 1837 kum in hattuom siem phatdan ding leh Thuginpi zong asiem uhi. Tualeh Mangpa Annsieng netah leh netahlou Geneva Council (Switzerland khawpi) te toh a ngaidan uh akibang sih a, thuneina akitu ua, Calvin in hattuom khu ama leh ama kivaihawm ding in ngaidan anei a, tualeh midangte’n kivaihawm khu leng leh thuneitute khut a um ding in a ngaituo uhi. A ngaidan uh akibah thei tahlou zieh un, Calvin leh Farel khu alah uapat in a nawkheta uhi. Calvin in Strassburgte lah ah Pastorna asem a, 1540 kum in Pastor

zi lui, zi masa (A pasal in ashisan) Mrs. Idelitte de Bure khu zi in anei a, ta khat anei ua, ata in ashisan nalai a, azi in zong 1549 in ashisan nalai hi.

4. John Calvin phattuomna:

Calvin khu Presbyterian hattuum paidan phuttu ahia, a phattuom mama hi. Laibu tampi phatuom mama agiel a, tua laibute miten kihilnan azang uhi. Hattuum kipuihuoi dan ding leh khotang hinkhuo asiem hoi na leh suhsienghounan alaibu gelte amang/zui uhi. Tualeh Geneva khawpi zong khaw siengthawu pen in asiem uhi. Ju kizuate akhah ua, lekha kapte asutawp ua, Cinema ente leh nungah tangval phanglente akhaam ua, sakhuo mi hina leh Pasian zatatna mite azilsah uhi.

Ana sepna thupipen khu ‘Institutes” kichi laibu agel khu ahi. Tualeh laibu dang zong tampi agiel hi. “Mihing khat in adamsung a asim khawp ding laibu agiel doh hi” aki chi va ia hi. A sermon gel zong bu 2000 sang a tamzaw mu ding a um hi. laizilna lam athupi ngai mama a, 1559 kum in a laizilna sangpen khu ‘Academy” achi uhi. Tulai a ‘University” kichi tuabang zong aphut khie hi. Geneva khuo zong sephawmna munpi ding in azang ua, gamdang hattuumten zong a ettawn pen ahi.

Calvin khu mipi Vaihawmna sawlkalna (Democracy) sukhangtoutu, supichingtu ahi. Tualeh Hattuum kivaipuohna leh kivaihawmna kizopdan siemdohtu zong ahi. Hattuum sung a lamkai ding kitel sawnte’n Hattuum sung ah vai ahawm ding ahi chi ahilchien a, tuabang a vaihawmna kizop in/kizui khu tulai a ei Presbyterian hattuum in izui penuh ahi. Tuasang a hoizaw tutan in ana um naisih hi.

Calvin khu kum 55 ahi in May 27, 1564 in ashi tahi. Shi hun in shi sih nanlezong, anasep khu mihing khat sep ding in ahuntawh mama hi.

Thuchiin:

Theipitu tampite lah a ka thugen na zahte, mi muonhuoi, midangte zong hilsawn thei dingte kungah kemsah in.

II Timothy 2:3

Dohna:

1. Calvin bang mi ahiei? Hei mun ah bang na asem ei?
2. Calvin Sermonna laibu bangzat agiel ei?
3. Calvin kum bangzat adam ei?
4. Calvin aphattuomna pen khu bang e?

.....